

Balua na bini
 gba Polo pi omabhuka na gudhu na
 Kolito
 Eli na kalanu

Balua na bini inde li Polo aye nani e pi okpála na Kolito-o, ani aye nani pindji ongu atsia mukobho gba omakiliso di ne nabhuka inde ali bhú Piga gba Ebhe nani li Polo a'o e bhú gudhu na Kolito-o. Bhú nedhinga ango-o, Kolito nani ne gudhu na ngbéngbé gba oGiliki inde li okpála ngangá apo bhula o bhú e-o, a ko 'ngbé gudhu na ndu doto na Akayi inde bhú nau na Loma-o . 'Li gudhu na Kolito au nani naali ka oehe na mase inde adu bhúbhú bhele-o, ne ka dasundu gba okpála ango-o, ne engú na zabhe inde adu bhúbhú naali-o, a la di-e ongangá engú na ebhe inde abedhe nani bhúbhú bedhe-o. Engú na ngbéngbé inde li Polo adu agu gbele ne e, a ko engú nagbo bhusu o, engú na zabhe inde adu bhú Dadjua gba Ebhe-o, ne ongu inde u ayi e pindji bhoko ne 00, ne pindji naha lio, pindji bua nakpokpo kú 'ngú, pindji namene 'ngú li kúkú bhú Dadjua gba Ebhe, pindji ehe li Bu Bhobua ngaha e padhá, a la di-e pindji nazuku gba okpála-o. La, Polo atsia asuno imbilangu gba e ne nasuno lele maka li Bádha Ngali ngagama 'ngú li ongu ango-o lie-o.

Alo na (13) inde ngasuno mukunda maka ehe na babadha naali inde li Ebhe ngaha e pi omaha e padhá-a, okpála mbila 'ngú pindji alo (13) ndjikpa ne ká bata-a naali ane oalo koko hana bhú bhuku inde. A ko engú inde li okpála ambila e ane mane bhú bhuku inde ngae.

Ongbengbe ongú inde bhú bhuku inde-e ngae inde:

Eli na kalanu 1:1-9

Nagbogbo bhusu o bhú Dadjua gba Ebhe 1:10 - 4:21

Dasundu na ndjindji gba eḷe ne bhoko, di ne piga gba e 5:1 - 7:40

Omakilisito a la di-e omupagano 8:1 - 11:1

Mukobho na Dadjua gba Ebhe a la di-e engú na Ebhe 11:2 - 14:40

Nazuku gba Kilisito a la di-e nazuku gba omabhuka 15:1-58

Naha makiso pi omakilisito na Yudaya 16:1-4

Engú nayi mayi a la di-e engú bhe na soso 16:5-24

Polo yi omabhuka na gudhu na Kolito mayi

¹ Ngama Polo, Ebhe a'i ma bhú ngu e me ma kolo bhulu titima gba YesuKilisito . Ya aye balua inde bhú dabili bini ne ndai ní Sosotene. ² Ya aye pi yi okpála na Dadjua gba Ebhe inde bhú gudhu na Kolito, ngayi okpála inde li Ebhe a'o o kpi pi e. Yi akolo okpála gba ani ka nabhuka Yesu Kilisito, bhú dabili bini ne ndu okpála hana inde ngabhu 'li Ngámá gba ní Yesu Kilisito ne ndu bili hana-o. Yesu ne Ngámá gba uo, a ko la di Ngámá gba ní-o. ³ Bádha bhú 'bu ne guo 'ngú gba 'Dyi ní Ebhe di ne Ngámá gba ní Yesu Kilisito-o du ne yi bhú dabili bini.

Obabadha 'ngú inde li Ebhe aha e pi okpála na Kolito bhú bádha bhú 'bu gba e-o

⁴ Ma ngagie heni pi Ebhe ndu nedhinga hana ngubula yi kabula bádha bhú 'bu inde ani aha e pi yi li kpadji gba Yesu Kilisito-o. ⁵ Bhú makpotsə gba yi ne Yesu Kilisito-o, Ebhe abedhe yi ne ndu obabadha ongú hana. Kaka-a, yi mbila nadi mabelu li eli gba ani-e ndjindji, a la di bhú 'ndji yi ne imbilangbu bhú ndu 'ngú hana. ⁶ Ngali gba Yesu Kilisito inde ya akpokpo e pi yi-e, asia dabili li bua yi

ndjindji. ⁷ Kaka-a, yi asia ndu 'he hana inde li Ebhe ngaha e pi okpála bhú bádha bhú 'bu gba e-o, ngayi okpála inde ngadjeke ekpí li Ngámá gba ní Yesu Kilisito asúno matá lie lie pi okpála-o. ⁸ Aní atéteke yi ngae me yi lu kpekpeke akólo li soso, amba kpála bini adú ne engú na sisiti napapa li yi de, li 'kpí li Ngámá gba ní Yesu Kilisito agó lie-o. ⁹ Ebhe gba ní-e djidji 'li e de. Aní a'í yi me yi kpətsə liyi ne Ndili gba ni Yesu Kilisito, Ngámá gba ní-o, aní djí 'li e bhomu-o de.

Omakilisito na Kolito agbogbo bhusu o

¹⁰ Ondaise ma, ma ngakikiliki lima pi yi ne 'li Ngámá gba ní Yesu Kilisito me, yi du ndu yi hana ne koli bua bini, yi agbógbo bhusu yi de. Yi gbite 'ngbo yi bini ne nadu ne mabhundja bini di ne nabhuka bini. ¹¹ Ondaise ma, ma pa mo-o padhá de, a ko anga okpála na piga gba Koloe apa mu ma me yi ngadje liyi ade. ¹² Engú ma apa e bhomu-o, ma apa anga suda yi-e, yi ngagbogbo bhusu yi. Okpála koko ngapa me o ngakpata Polo. Okoko ngapa me o ngakpata Apolosi.† Okoko ngapa me o ngakpata Piele. Okoko ngapa me o ngakpata Kilisito. ¹³ Engú yi ngamene e mana mugito me Kilisito agbo bhusu e magbo. Yi pa nga mu ma, u agi nani ma Polo li kulusi ngu nakobho yi uu? Yi asia nani batisimo ne 'li ma Polo? A mo-o ade.

¹⁴ Ma ngagie heni pi Ebhe anga ma batisa kpála bini bhú ka yi de. Ma abatisa bha bini Kilisipusi ne uo ne Gayusi† ¹⁵ Kaka-a, kpála bini ti da napa de me u abatisa yi ne 'li ma-a de. ¹⁶ A ko paká! Ma abatisa di nani piga gba Setefanasi.† Engú bini, ma ziba de me ma abatisa kpála koko uu-o de. ¹⁷ Padhá de, anga Kilisito tima nani

† 1:12 1:12 Tsia bhú 1 Kol. 16:12; di ne bhú Kul. 18:24-28.

† 1:14 1:14 Tsia bhú Kul. 18:8, 19:29. † 1:16 1:16 Tsia bhú 1 Kol. 16:15-17.

ma ngú nabatisa okpála de. Engú bini, aní atima ma ngú nakpokpo Bádha Ngali pí uo. Ma ngakpokpo Bádha Ngali ango-o ne mabelu má pua pua maka okpála koko ade. Lì ma dú nakpokpokpo ne mabelu maka okpála koko-o, nakpi gba Kilisito lì kulusi-e de matá ne tata ade.

Yesu Kilisito pí ní ne angu di ne imbilangu inde ayie ka Ebhe

¹⁸ Padhá de, anga pí okpála bhende lì kpadji na ngita-a, nakpokpo ngali píndji nakpi gba Yesu lì kulusi-e, a ko 'ngú na pele. Engú bini, pí ní obhende lì Ebhe ngakobho o-o, ní ngau angu gba Ebhe-e bhú ngali ango-o. ¹⁹ A maka u aye lie bhú Bhuku gba Ebhe-e me:

«Ma améne me imbilangu gba obhulu imbilangu-o kolo padhá.

Ma aú imbilangu gba uo bhú djila ma maka ehe na padhá.†»

²⁰ I dú me Ebhe nde apa mo-o, a akunda napa me, okpála na imbilangu na doto inde-e, imbilangu gba uo bhú 'ngú de. Okpála inde ngasuno olíli gba omaYuda-a, tata lì nasuno gba uo ade. La di-e, obhulu nadi mabelu na suku inde-e, mabelu gba uo-o, tata tété ade. Ebhe asuno bhomu-o me imbilangu na doto inde-e padhá. ²¹ Padhá de, anga okpála na doto ne imbilangu gba o na kpálakuti-e ti da nani nambila imbilangu gba Ebhe-e de. Kaka-a, lì kpadji na engú inde lì okpála ngau e bhú djila o maka engú na pele-e, Ebhe au ndjindji me ni kobho okpála inde ngabhuka-o. Engú na pele ango-o, a ko Bádha Ngali inde ya ngakpokpo e-o.

²² OmaYuda ngayo ongamba 'ngú kala me u bhuka, oGiliki naao ngagili imbilangu. ²³ La pí ya-a, ya ngakpokpo 'ngú gba Kilisito inde u agi e lì kulusi-o. Lì omaYuda

† 1:19 1:19 Tsia bhú Isa. 29:14.

ngadje engú angó-o lie, a ngangbingi 'ndji uo mangbingi. Lì okpála bhende ne omaYuda ade-e ngadjedje lie, a ngamene uo maka engú na pele. ²⁴ Engú bini, pí okpála bhende lì Ebhe alo o-o, i ðu di-e omaYuda, i ðu di-e obhende ne omaYuda ade-e, u ngambila ndjindji me Yesu Kilisito akolo pí o angu di ne imbilangu inde ayie ka Ebhe-e ngae. ²⁵ Okpála koko ngapa me engú lì Ebhe amene e bhú nakpi ka Yesu-o, a ko 'ngú na pele. Engú bini, engú inde u a'i e me a ko 'ngú na pele bhomu-o ane imbilangu gba kpála-kuti mane. I ðu me u nde ngabhundja me Ebhe bhubhuku-o, a mo-o ade. Padhá de, anga bhuku gba Ebhe-e ane angu gba okpála-kuti ne kpéke.

Ebhe nga'o tata lì ehe inde lì okpála ngau e bhú djila o padhá

²⁶ Ondaise ma, ngayi okpála lì Ebhe a'i o-o, yi bhundja nga me yi ne oda-ie! Nakpata mabhundja gba okpála na doto-o, okpála na imbilangu, ne obhende na angu, ne obhende azu lio bhú piga na tia bhú ká yi bhelé ade. ²⁷ Engú bini, Ebhe alo engú lì okpála na doto nga'i e me a ko engú na pele-e ngubula me imbilangu gba obhulu imbilangu-o kolo ehe na padhá. Anì alo ongu bhende lì okpála na doto ngau e me angu bhúbhú ade-e ngubula me angu gba bhulu angu-o kolo ehe na padhá. ²⁸ Anì alo ohe inde lì tata nde lie e ade, inde lì okpála na doto ngamu e, inde u ngau e bhú djila o padhá-o. Anì alo ngubula me ni bhili ohe bhende lì okpála ngau e me a tété ne tata-a ne di.

²⁹ Kaka-a, kpála bini ti da nadge kute e kala Ebhe de.

³⁰ La ngayi-e, Ebhe akpøtsø yi bhú dabili bini ne Yesu Kilisito. Anì amene me Yesu kolo pí ní imbilangu inde ayie ka ni-o. Yesu amene ngae me ní kolo ngbingbili bhú djila Ebhe. Anì amene me ní ðu libhomu pí Ebhe. Anì

atsia agbegbe di ní bhú bali gba siti. ³¹ Kaka-a, a maka u aye lie bhú Bhuku gba Ebhe-e me: «† du me kpála nde akunda nau lie ngbéngbé-e, aní de u lie ngbéngbé bhú engú li Ngámá Ebhe amene e ko.†»

2

Imbilangu li Polo adu akpokpo 'ngú pindji Yesu Kilisito ne e-o

¹ Ondaise ma, ngama makpe-e, nedhinga ma anu nani lie agba yi ngubula nakpokpo engú inde li Ebhe ambamba ta e li kpadji gba Kilisito-o , ma di pi yi mabelu bhe nane mane de. Ma gama di 'ngú pi yi ne imbilangu naali de. ² Padhá de, anga nedhinga ma adu lie agba yi-e, ma gili nambila engú koko bhú ka yi de. Ma agili bha bini nambila Yesu Kilisito, ma agili bha nambila makpe me-e Yesu Kilisito inde u agi nani e li kulusi-o. ³ Kaka-a, ma adu agba yi bhuku kpála, ma adu ne tsulu, ma atsia adu di naguku naali. ⁴ Bhú nasuno gba ma-a ne bhú nakpokpo Bádha Ngali-e , ma du nagama 'ngú ne imbilangu gba kpála-kuti de, ma du di nadi pi yi mabelu de. Engú bini, Bua gba Ebhe-e adu nani nasuno pi yi ne angu me engú ma adu akpokpo e adu kukulu 'ngú. ⁵ Ma adu akpokpo 'ngú pi yi mo-o ngubula me yi a'ó nabhuka gba yi-e bhú imbilangu gba okpála de, engú bini yi 'o mangbo bhú angu gba Ebhe-o.

Imbilangu li Polo ngakpokpo 'ngú ne e ayie ka Ebhe

⁶ Nedhinga ya ngasuno lie pi okpála inde abhele li kpadji gba Ebhe-e abhele-e, ya ngasuno kukulu imbilangu, a ko imbilangu na doto inde-e de. A ko la di bhende gba ongámási na doto inde li 'bhø ngámá gba o

† 1:31 1:31 Tsia bhú Djlm. 9:22-23.

andjía mandjia de. ⁷ Imbilangu ya ngakpokpo 'ngú ne e inde-e, a ko mangbo imbilangu gba Ebhe. A ko ehe inde awo lie mawo, inde li okpála du nani nambila e de. Kala me Ebhe bho doto-o, Ebhe a'o nani imbilangu ang-o ngubula me ní sia té sangu gba ni-o. ⁸ Ongámási na doto inde-e mbila nani imbilangu ang-o de. I dú me u mbila nani uu-o, u de bhøø nani Ngámá gba ní inde abedhe ne sangu bedhe li kulusi de. ⁹ Ehe li Ebhe amene e, a maka u aye lie bhú Bhuku gba ani-e me:

«Engú inde li djila okpála u nga nani e de-e,
li 'dje okpála dje nga nani e de-e, di ne bhende li
okpála bhundja belegu

engú li e de-e, a la bhomu-o engú inde li Ebhe aleke nani
e pi okpála inde
ne mukunda pi ani-o.†»

¹⁰ Pi ní-e, Ebhe ambamba ta engú ang-o bhú angu gba Bhobua gba e-o. Bhobua ang-o mbila ndu 'ngú hana. Ani mbila belegu mabhundja gba Ebhe inde awo lie mawo-o. ¹¹ Bhú ká okpála-a, a ko da inde ambila engú inde bhú kilí e? A ambila bha bini ne bua inde bhú kpála ang-o. A bhadi moko, engú inde bhú Ebhe-e, ambila bha bini ne Bhobua gba Ebhe-o. ¹² Pi ní-e, Bua inde bhú ní-e yie ka okpála na doto inde-e de, engú bini, a yie ka Ebhe. Ebhe aha pi ní ngubula me ní mbila ndu 'he inde ani aha e pi ní bhú bádha bhú 'bu gba e hana. ¹³ Nedhinga ya ngakpokpo 'ngú lie pi okpála-a, ya ngakpokpo ne imbilangu gba okpála ade. Engú bini, ya ngakpokpokpo ne imbilangu inde ayie ka Bhobua gba Ebhe-o. A akunda napa me, ya ngambamba ta ongú pindji Bhobua gba Ebhe-e pi okpála inde li Bua ang-o

† 2:9 2:9 Tsia bhú Isa. 64:3, 52:15.

nde bhú o-o.*

¹⁴ Kpála bhende li Bhobua gba Ebhe-e nde bhú e ade-e ti da naziba obisagu inde li Bhobua ango-o ngaha e pi okpála-a de. Bisagu ango-o pi ani maka engú na pele. Imbilangu ngú nambila 'ngú ango-o bhú 'ndji ani ade. Padhá de, anga Bua gba Ebhe-e ti da nambamba ta 'ngú ango-o bha pi kpála ngae. ¹⁵ Kpála inde li Bua gba Ebhe-e nde bhú e mbila ndu 'ngú hana, bhende na babadha, ne bhende na sisiti. Engú bini, ngaani-e, kpála bini ti da nambila 'ngú inde bhú ani-e má kpulukutu de. ¹⁶ A maka u ye lie bhú Bhuku gba Ebhe-e me:
«Kpála bini mbila engú inde li Ebhe Ngámá ngabhundja e de.

Kpála bini ti da naha líli pi ani de.†»

Engú bini, ngaya okpála li Bua gba Ebhe nde bhú o-o, nambhundja gba ya viti ne bhe gba Kilisito bini.

3

Omabhuka na gudhu na Kolito maka okpála inde ngakpata Yesu na mbia

¹ Ondaise ma, pi ma-a, nedhinga ma adu lie agba yi-e, ma ti nani da nagama 'ngú pi yi maka okpála li Bua gba Ebhe-e nde bhú o-o de. Engú bini, ma agama bha ibili 'ngú pi yi maka okpála na doto inde. Padhá de, anga yi adu maka okpála inde i ngakpata nga Yesu Kilisito na mbia. ² Ongú inde ma asuno e pi yi-e adu maka miliki. A adu ezu na kpekpeke de. Belegu pi mbia inde-e, yi ti nga da nazu ezu na kpekpeke de. ³ Padhá de, anga yi nga bha ngakobho maka okpála na doto inde, anga yi ngamene 'he

* 2:13 2:13 li bili inde-e, u ti da di napa me: «Ya ngakpokpo engú pindji Bhobua gba Ebhe-e pi okpála ne oeli inde ayie ka Bhobua ango-o.» † 2:16 2:16 Tsia bhú Isa. 40:13.

liyi sunda yi ne 'ngbé bua. Yi la di ngatsi sunda yi. 1
 du me yi nde ngamene mo-o na paká-a, yi mbila de me
 bhobhomu-o ngasuno me yi nga bha ngadhuku maka li
 kute yi akunda lie di? 4 Nedhinga li kpála bini bhú ká yi
 ngapa lie me ni ngakpata Polo-o, li kpála koko pa me ni
 naani ngakpata Apolosi-e, asuno me yi ne okpála inde na
 doto. A mo-o adi?

Ebhe ne Ngámá na kulu gba ní-e ngae

5 Apolosi ne da? Polo la di ne da? Ya bha ne obalise
 gba Ebhe inde ani atima o ngu nakpokpo eli gba e pi yi,
 ngubula me yi bhuka Ngámá Yesu Kilisito. Kpála ne kpála
 bhú ká ya bha ngamene kulu inde li Kilisito aha e pi ani-
 o. 6 Ya adu maka okpála nalu nguwa. Ngama-a, ma akpo
 lita nakpokpo eli gba Ebhe-e bhú ká yi maka kpála inde
 ngalu nguwa. Apolosi anu ne di ne kalanu maka kpála
 inde ngabolo 'ngu pí 'zu-o. Engú bini, Ebhe amene ngae
 me ezu ango-o bhele. 7 Bhobhomu-o asuno me, ne kpála
 inde ngalu nguwa, ne bhende ngatuko 'ngu pépé-e, tetele
 kpála bhú ká uo ade. Engú bini, kpála na tetele mangbo
 ne Ebhe, anga ani ngamene ngae me ezu-o bhele. 8 Ne
 kpála inde ngalu nguwa, ne bhende ngatuko 'ngu pépé-e,
 u viti bini. Ebhe ahá makalá na kulu gba kpála ne kpála-a
 pi e li lele kulu gba e-o. 9 Ndu ya bhisi hana, ya ngamene
 kulu gba Ebhe-e bhú dabili bini. Ngayi-e, yi maka edyi
 gba Ebhe.

Yi la di maka eti li Ebhe ngayiki e-o. 10 Bhú bádha
 bhú 'bu gba Ebhe-e, Ebhe aha angu muu, ma atsia aholo
 namene kulu gba ani. Ma adu maka kpála nayiki eti ne
 imbilang, inde ambila di nabanga 'dhu 'ti-e ndjindji,
 kpála na kulu koko atsia ago ngu nadyudyo kulu ango-
 o ne kalanu. A ayo me kpála ne kpála inde nga'o biliki pí
 'dhu 'ti ango-o, 'o li lelele. 11 'Dhu 'ti ango-o, a ko Yesu

Kilisito inde yi nga'o nabhuka gba yi-e bhú e-o. Kaka-a, kpála bini tí da na'o matá 'dhu 'tí koko de. ¹² Pí 'dhu 'tí ango-o, okpála koko ngayiyiki ne tia kulu inde ngabhue mabhue maka olo, aladja di ne teme na mase naali. Okpála koko ngayiyiki ne tia kulu inde i bhúe de maka ndula, ulu di ne soli.

¹³ La-a, li 'kpí li Ebhe akódho 'ngú gba okpála na doto lie-e, kulu gba musuno bini ne bini akóto bhú mbasu. Okpála aú kulu gba uo-o mbámhá. Padhá de, anga li kpí ango-o, Ebhe alé kulu gba kpála ne kpála bhú djua ngú nambila me ne me a ndjindji, ne me a sisiti. ¹⁴ I du me kulu inde li kpála amene e nde tsi bhú djua de-e, li Ebhe há makalá pí kpála ango-o. ¹⁵ Engú bini, i du me kulu inde li kpála amene e nde atsi bhú djua-a, Ebhe há makalá pí ani de. Ebhe akóbho kpála ango-o makobho, engú bini, kpála ango-o avθ kukuo, ani de atsi bhú djua atsi.

¹⁶ Yi mbila de me yi maka Eti gba Ebhe, di ne me Bua gba ani-e ngadu bhú yi-e di? ¹⁷ I du me kpála nde abhøø Piga gba Ebhe-e, li Ebhe bhøø di kpála ango-o. Padhá de, anga Ebhe a'o Dadjua ango-o pí e. Piga inde ani ngadu bhú e-e, a ko yi.

Imbilangu gba Ebhe-e kpi ne *imbilangu* gba okpála-kuti

¹⁸ Kpála bini apíte lie de. I du me kpála bini bhú ka yi nde ngabhundja me ni ne *imbilangu* maka okpála na doto inde-e, ani de yala *imbilangu* gba e bhomu. Ani kolo mangbo bhú djila okpála na doto maka bhulu pele, amba ani sia *imbilangu* na kukulu. ¹⁹ Ma pa mo-o padhá de, a ko anga oehe li okpála na doto nga'i e me a ko *imbilangu*-o, a ko ongú na pele bhú djila Ebhe. A maka u aye bhú Bhuku gba Ebhe-e lie me:

«Ebhe ngaholo okpála i ngabhi 'kpa o pí mbulu o me

o ne obhulu imbilangu bhú oeli na kali gba o-o.†»
²⁰ U aye di matá bhú bhuku gba Ebhe-e me:
 «Ebhe mbila mabhundja gba okpála inde ngabhi 'kpa o pi
 mbulu o me
 o ne obhulu imbilangu-o hana.

Ani mbila hana me a padhá.†»

²¹ Kaka-a, ma apa pi yi me kpála bini bhú ka yi abhi 'kpa e pi mbulu e bhú nakpata musuno de. Padhá de, anga ndu 'he hana ne naayi. ²² Ne ma Polo, ne Apolosi, di ne Piele-e, ya ndu ya hana ne naayi okpála. Belegu doto, ne mukobho di ne kuo ne naayi 'he. Ongú na naki inde di ne ongú agó galikpe bhadi ne ndu naayi 'he. ²³ Engú bini ngayi-e, yi ne okpála ka Yesu Kilisito, Yesu Kilisito ne kpála ka Ebhe.

4

A ayo namanga obhulu titima gba Yesu-o mamanga

¹ A ayo me okpála mbila me, ngaya, obhulu titima gba YesuKilisito-o , ya ne okpála na kulu gba ani. Ebhe a'o ongú inde nani awo lie mawo-o sakpa ya ngubula me ya suno pi okpála. ² Yi mbila ndjindji me, engú inde u ngayo e ka kpála inde u a'o 'he sakpa e, a ko nadu ngbingbili. ³ La pi ma-a, belegu ngayi-e, yi pa me ma ne siti kpála, ne me ma ne siti kpála ade-e, a méne 'he bini ngu ma de. Abana li okpála nakodho 'ngu-o pa me nganda kulu gba ma-a a ndjindji, ne me a ndjindji ade-e, a méne 'he bini ngu ma de. Abana ngama makpe, ma pa de me nganda kulu gba ma-a ndjindji, ne me a sisiti-e de.

⁴ Padhá de, anga pi ma-a, bua ma pa mu ma de me ma ngamene siti 'ngu-o de. Engú bini, bhobhomu-o kunda

† 3:19 3:19 Tsia bhú Dj. 5:13. † 3:20 3:20 Tsia bhú Ets. 94:11.

napa de me ma mene siti 'ngú de-e de. Ngámá Ebhe akódho mangbo engú gba ma-a ngae. A akódho ne kpála koko de. ⁵ Kaka-a, yi akódho 'ngú gba okpála koko de. Yi djeke mangbo me nedhinga li Ebhe a'o e ngú nakodho 'ngú gba okpála kolo paká. A ko okpí li Ngámá Yesu agié lie lie-o. Li 'kpí ang-o, aní apándja ondu 'ngú hana inde awo lie naki mawo-o bhú mbasú. Aní agbé engú inde li okpála nde ngabhundja e li bua o-o li zi 'kpí. Ekpí ang-o, li Ebhe tsia dhégə kpála ne kpála li lele kulu gba e-o.

⁶ Ondaise ma, ma apa ongu bhomu-o pi yi pindji ya ne Apolosi ngubula nateteke yi, amba yi mbila ongu inde bhubhu-o. Ma akunda me yi kpata nganda ya ngubula me yi kə mboli gbitaku inde-e me: «A ayo napise li kozie inde u a'o e-o.» A ayo de me kpála bini bhú ká yi sia 'ngbé 'ndji ne 'ili me ni naani ne kpála ka tsipakala, amba aní u okpála koko bhú djila e padhá-a de. ⁷ Ngamu kpála inde ngabhundja me ni ane okpála koko mane-e, mu naamu ne da? Ebhe ha ndu 'he inde ka mu-o hana pi mu ngae di? I du la me Ebhe nde aha pi mu ngae, mu ngamene 'ngbé 'ndji tété mugito me mo osia ka angu gba mu-o ka ni?

'Ngbé 'ndji gba omabhuka na Kolito

⁸ A ndjindji, anga yi asia naayi ndu 'he hana inde li Ebhe ngaha e asia. Yi ibili ne obhulu tia li kpadji na nabhuka . Yi ngapa me yi ndu yi hana ne ongámási, la ngaya obhulu titima gba Yesu Kilisito-o, ya naaya ne ongámási ade. I du me yi du bhú djila Ebhe ne ongámási na paká-a, a de ndjindji ngubula me ni u ne yi bhú dabili bini. ⁹ Ya ne obhulu titima gba Yesu Kilisito. Engú bini, ma ngau mugito me Ebhe a'o ya asidi pita ndu okpála koko hana. Ya maka okpála bhende u akodho 'ngú gba o, inde u abhili o kala ndu okpála hana. A akunda napa me

doto libhomu ne okpála-kuti la di ne oandjelu ngatu 'ue bhú 'ndji ya maka bhú da ngeme.

¹⁰ Ngaya-a, ya ne obhulu pele kabula 'li Yesu Kilisito! La ngayi-e, yi ne obhulu imbilang kabula ani! Ngaya-a, ya ne okpála li angu nde bhú o ade! Engú bini, ngayi-e, yi ne okpekpeke okpála! Ngaya-a, okpála ngau ya bhú djila o padhá, engú bini, ngayi-e u ngamanga yi mamanga! ¹¹ Nakolo pi mbia inde-e, ya ngadje gumu di ne gumu 'ngu. Ya ngadyi obongo inde akadha. U ngato mbolo li ya. Ya sili kuti de. ¹² Ya ngamene kulu ne 'kpa ya kpekpeke. Nedhinga li okpála ngasobho ya lie, ya ngayo Ebhe me ani tuko bisagu pi uo. Nedhinga li okpála ngato mbolo li ya lie, ya ngakikibila, ya gisila de. ¹³ Nedhinga li okpála ngapa 'ngú gba ya lie sisiti-e, ya ngagie pi uo bhuku eli. Ya akolo maka oehe inde u abala e api 'ká. Nakolo pi naki-e, ya akolo maka oehe inde li tata nde lie ade.

Polo asuno bua gba e na 'dyi ongisi-e pi omabhuka na Kolito

¹⁴ Ma ye engú inde-e de me yi sia numu ká engú inde yi ngamene e de. Ma aye mangbo ngubula me ma ha líli, anga yi ne ongisi gba ma na mukunda. ¹⁵ Padhá de, anga abana li omusuno du bha ka yi bhelé-e li kpadji gba Yesu Kilisito-o, koli 'dyi yi bha bini. 'Dyi yi ango-o, a ko ma. A akunda napa me ma akpo lita nakpokpo Bádha Ngali gba Yesu Kilisito pi yi ngama. ¹⁶ Ma nde lie ne 'dyi yi-e, ma ngayo ka yi me yi mene engú inde ma ngamene e-o. ¹⁷ Ngubula nateteke yi-e, ma atima Timoté agba yi oo. Ma atima ani ngubula me ani nu suno pi yi ne toto lele maka ma ngadhuku lie li kpadji gba Yesu Kilisito-o. Ongú inde ani asuno e pi yi-e, a bhomu-o ongú inde ma susuno e pi okpála gba Ebhe ne ndu bili hana-o. Yi dje Timoté,

a ko ndili gba ma na mukunda-o. Anì la di ngadhuku ngingbili lî kpadji gba Ngámá Yesu Kilisito.

¹⁸ Okpála koko bhú ka yi ngabhi 'kpa o pí mbulu o anga u ngabhundja me ma agó matá gba yi oo de. ¹⁹ Engú bini, i du me Ngámá gba ní-e nde aziba-a, ma agó oo ne 'kpí bhisi inde. Lî ma kolo oo, ma ú obhulu 'ngbé 'ndji bhomu. Ma tsia mbila ne me u bha ngape 'li o padhá, ne me abhú uo ne angu namene engú. ²⁰ Padhá de, anga Nau gba Ebhe-e ne eli ade, a mangbo bhú angu gba Bu Bhobua . ²¹ Nedhinga ma agó lie agba yi-e, yi akunda me ma go ne mangua 'ngú dho? Yi akunda me ma ago sakpa ma ne fimbo? Ne me ma go ne bhuku bua ngú nasuno pi yi me ma kunda yi naali?

5

Polo apa pi omakilisito me u gbe kpála inde amene siti 'ngú bhú ka o magbe

¹ Ma ngadje ngali gba yi-e ndu 'kpí hana. Okpála ngapa me bhú ká yi-e, okpála koko ngadhuku ne olisi, i du di-e ne obhosi ngangá. A ko engú inde belegu okpála i bhuka Ebhe de-e ti da namene e de. A mana mugito me suka yi bini ngadhuku ne wala 'dyi e.† ² Ngayi-e, engú angoo ngaha pi yi 'ngbé 'ndji. A ayo la igini me yi de aku 'gbá ngubula siti 'ngú angoo. A ayo la di igini me yi gbe ngua makilisito bhomu-o bhú ká yi magbe.

³ Ngama-a, belegu ma nde lie bhú ka yi ade-e, bua ma ne yi bhú dabili bini. Ma akodho engú gba kpála inde amene engú bhomu-o akodho mugito me ma ne yi bhú dabili bini. ⁴ Ma akodho 'ngú bhomu-o ne 'li Ngámá gba ní Yesu. Ma ngapa pi yi me, yi po bhúla yi-e, lî bua ma

† 5:1 5:1 Tsia bhú Lev. 18:8; di ne bhú Det. 23:1.

dú ne yi bhú dabili bini. Li angu gba Ngámá gba ní Yesu tsia súno di lie. ⁵ Nedhinga yi apó bhúla yi lie, yi pu kpála bhomu-o pí Satana* ngubula me siti 'ngú inde bhú ani-e koto hana má kpokobhø, amba Ebhe kobho bua ani li 'kpí li Ngámá gba ní Yesu agó lie ngú nakodho 'ngú gba okpála-o.

⁶ A ndjindji ade me yi bhi 'kpa yi pí mbulu yi li siti 'ngú bhomu-o de. Yi mbila de me mboye ku levile bedi-e ngamene ngae me faline libhomu fuka di-i? ⁷ Yi 'e siti 'ngú bhomu-o bhú ka yi ma'e. I du me yi nde amene mo-o, yi kolo bubu maka faline inde u 'o levile bhú e de-o. Ma ambila ndjindji me Ebhe amene me yi kolo bubu li kpadji nakpi ka Yesu Kilisito . Yesu maka ndili kandøø inde u abhøø e ngubula me okpála zu bhú anokomia na Pasika . ⁸ Kaka-a, ní kpi djali kabula li Ebhe agbegbe ní lie bhú bali-o. Ní 'e osisiti 'ngú gba ní-e maka li omaYuda a'e nani dili levile gba o lie ngubula nazu anokomia nazu mapa inde li levile nde bhú e ade-o . Ní mene mo-o, ní dú bubu, di ngbingbili kala Ebhe.

⁹ Bhú balua ma atima nako e pí yi kalanu-o, ma apa pí yi bhúbhú me yi adú bhú dabili bini ne okpála inde ngadhuku ne olisi, i du di-e ne obhosi ngangá-a de. ¹⁰ Ma pa engú bhomu-o pí yi pindji ndu okpála na doto inde-e hana de. Ma pa engú bhomu-o pindji okpála inde ngadhuku ne olisi, i du di-e obhosi ngangá-a de, ne pí obhende li gumu 'he gba okpála abedhe bhú o bedhe-e de. Ma pa la di engú bhomu-o pindji okpála inde ngazi 'he-e de, i du di-e obhende ngadhøgø ebhe na eu-o de. Li kpála kunda nadu bhú dabili bini ne okpála bhomu-o de-e, kpála ango-o de yie píla doto mayie.

* 5:5 5:5 Napu kpála pí Satana: Ti da napa li bili inde-e me nagbe kpála bhú Piga gba Ebhe.

¹¹ Ma akunda mangbo nayoko yi me, yi akpótsø liyi ne kpála inde ngapa me ni ne makilisito me ani nde ngadhuku ne olisi, i du di-e ne obhosi ngangá-a de. Yi akpótsø liyi ne omakilisito bhende li gumu 'he gba okpála abedhe bhú o bedhe-e de. Yi akpótsø liyi ne omakilisito bhende ngayo ebhe na eu-o de, i du di-e makilisito inde ngasobho okpála koko, ne obhende ngalangba ne pandi, i du di-e bhulu 'zi-e de. Yi akpótsø liyi ne uo de. Yi azú 'he ne ngua kpála bhomu-o belegu de bini. ¹²⁻¹³ Padhá de, anga a ko 'ngú ka ma de me ma kodho 'ngú gba okpála inde ne omakilisito ade-o. Ebhe akódho 'ngú gba uo-o ngae. Engú bini ngayi-e, yi ti da nakodho 'ngú gba omakilisito yi nde ne o-o. Maka u aye lie bhú Bhuku gba Ebhe-e me: «Yi gbe kpála inde ngamene siti 'ngú bhú ká yi-e magbe.†»

6

Lele naleke 'ngú sunda omakilisito

¹ I du me suka yi nde ne 'ngú sunda o ne ndai e-e, lele pi ani ti da nanu lie ne di kala ongámási na doto? A ayo mangbo igini me ani nu ne ani kala okpála gba Ebhe. ² Yi mbila de me okpála gba Ebhe-e akódho 'ngú gba okpála na doto li sokpi-e ngao di? I du la me yi nde akódho 'ngú gba okpála na doto-o, lele pi yi ti da nakodho odjedje ongú inde-e lie de-e? ³ Yi mbila de me ni akódho belegu engú gba oandjelu-o ngani-e di? Ka ni la ni ti da nakodho odjedje 'ngú na naki inde-e lie de? ⁴ Li odjedje 'ngú du sunda yi-e, ka ni yi nganu lie ne di kala okpála inde bhú Piga gba Ebhe-e ade-e? ⁵ Ma ngapa 'ngú bhomu-o ngubula me yi sia numu. Kpála na imbilangu bini bhú

† 5:12-13 5:12-13 Tsia bhú Det. 17:7.

ka yi adi ngubula me ani leke 'ngú sunda omakilisito-o?
⁶ A bha ndju ndjindji me li makilisito du ne engú sunda e ne makilisito-o, u de nu ne di kala okpála inde i bhuka Yesu di?

⁷ A na paká me nadu ne engú sunda yi-e, a bhomu-o numu na ngbéngbé. I du me u nde mene ngbili 'ngú li pabili gba yi-e de-e, u nde ngazi 'he gba yi-e, ka ni yi tí da nakikibila lie ne 'ndjá bua de-e? ⁸ Engú bini, okpála inde i mene ngbili 'ngú pi okpála koko de-e ne yi! Yi la di ngazi 'he gba ondaise yi omakilisito!

⁹ Yi mbila na paká me okpála inde ngamene osisiti 'ngú-o lí bhú Nau gba Ebhe-e de. Yi apíte liyi de, okpála inde ngakunda olisi, i du di-e ne obhosi ngangá-a, ne obhende ngadhogho oebhe na eu, ne obhende ngakunda olisi, i du di-e obhosi gba okpála koko, i du di-e obhende ngakunda lio sunda o maka olo ne bhoko, u li bhú Nau gba Ebhe-e de. ¹⁰ Yi apíte liyi de, obhulu 'zi, ne obhende li gumu 'he gba okpála abedhe bhú o bedhe, ne obhende ngalangba ne pandi, ne obhende ngadi okpála koko, ne obhende ngagbulu 'he gba okpála ne kpéke djila-a, lí bhú Nau gba Ebhe-e de. ¹¹ A na paká me bhú ká yi-e, okpála koko adu nani namene osisiti 'ngú bhomu. Engú bini, mbia inde-e, Ebhe avulu yi bhú siti 'ngú gba yi-e avulu. Ani a'o yi kpi pi e, ani atsia amene me yi kolo ngbingbili kala ni. Ani amene ndu 'ngú bhomu-o hana li kpadji gba Ngámá gba ní Yesu Kilisito di ne bhe gba Bu Bhobua gba e-o.

Kute ní ne eti gba Bu Bhobua

¹² Mu ti da napa me: «Ma nde lie ne makilisito-o, ma ti da namene ndu 'ngú hana.» A na paká moko, mu ti da namemene. Engú bini, ongu koko bhú ká ongu inde mu ngamene e bhomu-o ti da nateteke mu de. Ma aziba

me, ma ti da namene ndu 'ngú hana. Engú bini ngama-a, ma kunda nadu bali na 'ngú bini de. ¹³ Mu ti da napa matá me: «Ebhe aha ezu ngubula nabedhe ebue ne di. Aní atsia amene di ebue ngubula ezu.» A na paká moko. Engú bini, li sokpí-e, Ebhe abhólo ebue, aní tsia bhólo di ezu. Ndu ndu bhisi hana tsia ndjulu. Padhá de, anga Ebhe bho kute ní ngubula nadhuku ne olisi, i du di-e ne obhosi ngangá de. Aní amene mangbo kute ní ngubula nakpata Ngámá Yesu ne di. Padhá de, anga a ko Ngámá na kute ní ngae. ¹⁴ Ebhe azuku Ngámá gba ní Yesu Kilisito bhú kuo. Aní azúku bhadi kute ní bhú angu gba e-o.

¹⁵ Yi mbila de me, kute yi ne suka yá Kilisito di? Lele pí ma ahá kute ma inde suka yá Kilisito lie ngú nakpəkpətsə ne kute ələ na zabhe-e? Bhobhomu-o méne lie belegu de bini! ¹⁶ Yi mbila de me, i du me kpála nde akpətsə lie ne ələ na zabhe-e, ndu uo bhisi hana akolo koli kute bini-e di? Padhá de, anga u aye bhú Bhuku gba Ebhe-e me: «Ndu uo bhisi hana akólo koli kpála bini.*» ¹⁷ La-a, kpála bhende akpətsə lie ne Ngámá-a, akolo ne aní ne koli bua bini. ¹⁸ Ka 'ngú ango-o, yi 'o nadhuku ne olisi, i du di-e ne obhosi ngangá ma'o. Ondu 'ngú na sisiti li kpála amemene e hana-a, aní memene ne kute e de. Engú bini, kpála inde ngakpətsə lie ne ələ na zabhe-e ngamene siti 'ngú ne kute e makpe. ¹⁹ Yi mbila de me kute yi ne eti gba Bu Bhobua-a di? Yi mbila la di de me Bu Bhobua ango-o ngadu bhú yi, Ebhe aha la di pí yi ngae di? Kute yi ne ehe ka yi ade. A ko na Ebhe. ²⁰ Ebhe akala yi bhú kpéke mase. Kaka-a, kute yi dhəgə Ebhe bhú ndu 'ngú hana inde yi ngamene e ne di-o.

* ^{6:16} 6:16 Nakolo koli kpála bini inde si-e, a kpi ne nakolo koli kute bini. Tsia bhú Dje. 2:24.

7

Polo agie 'ngú pí omabhuka na gudhu na Kolito píndji 'ngú na kuva

¹ Mbia inde-e, ma ngagie 'ngú pí yi lí ongú maka yi ayi ma lie bhú balua gba yi-o. Ngayi-e, yi ngapa me: «A ndjindji pí bhoko me aní abú 'kpa e lí 00 de.» ² Abana mo-o, ma ngabhundja me, kabula nadu nadhuku ne olisi, i du di-e obhosi ngangá de-e maka okoko bhú ká yi ngamemene lie, a ndjindji me bhoko ha 00 gba e, amba 00 ha di bhoko gba e. ³ A ayo me bhoko mene pí 00 gba e ehe inde lí bhoko amemene e pí 00 maka a ayo lie-o. A ayo la di me 00 mene pí 'ko e engú inde lí 00 amemene e pí bhoko gba e ko.

⁴ 00 tí da namene ne kute e maka aní akunda lie de. Kute aní ne ehe ka 'ko aní. La di-e, bhoko tí da namene ne kute e maka aní akunda lie de. Kute aní ne ehe ka wala aní. ⁵ Kpála bini agbite kute e pí kilí e de. Yi mene bha bini mo-o me yi nde adje liyi bhú dabilí bini, ngú na'o mbo nedhinga ngubula nayo Ebhe. Pipita-a, amba yi gie liyi bhú dabilí bini, anga yi mene mo-o de-e, yi tí bhú gumu kute, yi tsia tí bhú ekú gba Satana . ⁶ Engú nagbite kute o ngubula nedhinga bedi ma ngapa e pí yi inde-e, a ko líli de, a ko mangbo ngú napa pí yi me, i du me yi nde amene mo-o, a adú sisiti de.

⁷ Ma akunda naali me ndu okpála hana du olingbangi maka ma. La-a, a tí da namene lie mo-o de, anga Ebhe aha makalá pí ní kpi kpi kpi. Aní aha pí okoko naha lío. Aní atsia aha pí okoko nadu olingbangi.

⁸ Engú ma ngapa e pí olingbangi ne o0k0si-e ngae inde: a ndjindji pí yi nadu kpi yi kpi maka ma. ⁹ Engú bini, yi u me yi tí da nadu kpi yi kpi de-e, yi de ha liyi. A ndjindji me yi ha liyi nane me gumu kute ha angu yi.

A ayo me omabhuka inde bhú kúva-a agbó bhúsu o de

¹⁰ Pí okpála bhende bhú kúva-a, ma ngapa bhobhomu-o ngama Polo ade, a ko Ngámá Yesu Kilisito . Aní apa me, a ayo de me ọlọ yie bhú kúva-a de. ¹¹ I dú me ọlọ nde ayie bhú kúva-a, aní ahá matá bhoko koko de. I dú me aní nde au me ní tí da nadu kpi ní kpi de-e, aní de gie lie bhú kúva gba e-o. Pí bhoko-o, a ayo de me aní gie wala e de.

¹² Pí okpála koko-o, ma ngapa 'ngú inde-e ngama, a ko Ngámá Yesu de. Ma ngapa me: i dú me a nde ka makilisito na bhobhoko ne ọlọ inde mupagano-o, i dú me ọlọ ango-o nde akúnda nadu ne 'ko e-e, 'ko aní de dú ne aní. ¹³ A bhadi moko pí ọlọ inde makilisito. I dú me 'ko aní nde ne makilisito ade-e, lí bhoko ango-o kúnda nadu ne wala e-e, u de dú ne aní. Ọlọ-o atsé aní de. ¹⁴ Padhá de, anga bhoko inde ne makilisito ade bhomu-o tí da nabhuka ka wala e inde ne makilisito-o. A bhadi moko pí ọlọ inde ne makilisito ade-o. I dú me 'ko aní nde ne makilisito-o, aní tí da nabhuka ka 'ko e inde makilisito-o. Padhá de, anga i dú mo-o de-e, lí ongisi gba uo-o dú maka ongisi gba okpála inde i bhuka de. Engú bini, u tí da nabhuka ka 'dyi o, i dú di-e ka 'hi o inde abhuka-o.

¹⁵ La-a, kpála bhende ne makilisito ade-e kúnda nagbo bhúsu o ne makilisito-o, u de gbo bhúsu o. A moko, kpála inde ne makilisito, i dú bhoko, i dú di-e ọlọ-o sa lílí bini ngú nadu bha bhú kúva bhomu ade. La-a, yi mbíla me Ebhe a'í ní me ní dú bhú kúva bhú guo 'ngú . ¹⁶ Mu tí da nambíla lele pí, ngamu ọlọ inde ne makilisito me ní tí da nakobho 'ko ní de-e? I dú di-e ngamu bhoko inde makilisito-o, mu tí da nambíla lele pí me ní tí da nakobho wala ní de-e?

A ayo me kpála ne kpála dũ kala Ebhe lele maka anĩ adũ nani lie-o

¹⁷ Engú na ngbéngbé inde bhú 'ngú bhomu-o, a ko me kpála ne kpála dũ maka li Ngámá Ebhe aha pi anĩ lie-o. A ayo la di me anĩ dũ maka anĩ adũ nani lie nedhinga li Ebhe a'i anĩ lie-o. A bhomu-o líli inde ma aha e bhú ndũ oDadjua gba Ebhe-e hana-o. ¹⁸ I dũ me Ebhe nde a'i kpála me anĩ nde ali gandja ali-e, a ayo de me anĩ wo gandja inde anĩ ali e bhomu-o de. I dũ la me Ebhe nde a'i kpála me anĩ nde li nga ngandja de-e, a ayo de me anĩ li gandja-a de. ¹⁹ Padhá de, anga li kpála li gandja-a, anĩ li di gandja de-e ne 'ngbé 'ngú ade. Engú na ngbéngbé-e, a ko namene líli gba Ebhe.

²⁰ A ayo me kpála ne kpála dũ lele maka anĩ adũ nani lie li nedhinga li Ebhe a'i anĩ lie-o. ²¹ Mũ dũ nani ne bali nedhinga li Ebhe a'i mũ lie? Mo odjé tsulu de. Engú bini, i dũ me a nde pi mũ nedhinga me mũ koto bhú bali-e, mũ de koto. ²² Kpála bhende adũ nani bali li nedhinga li Ngámá a'i anĩ lie akoto mbia inde bhú bali-e akoto, anga anĩ akpøtsø lie ne Ngámá. La-a, kpála bhende ne bali bhú 'ngú na doto ade-e, inde li Ebhe a'i e-e, anĩ akolo mbia inde-e bali gba Kilisito. ²³ Ebhe akala yi ne mase naali. Kaka-a, a ayo de me yi kolo obalise gba okpála na doto de. ²⁴ Ondaise ma, a ayo me kpála ne kpála dũ kala Ebhe lele maka anĩ adũ nani lie li nedhinga li Ebhe a'i anĩ lie-o.

Engú pindji olingbangi

²⁵ Pi okpála bhende i ha nga olisi de-e, ma ngaha pi yi-e mabhundja gba ma maka kpála inde u ti da naziba e ka bádha bhú 'bu gba Ebhe-o. Ebhe kata ma ngae de. ²⁶ Ka likabhu inde na nedhinga inde-e, ma abhundja me a ndjindji pi kpála me anĩ dũ bha maka anĩ nde lie-o. ²⁷ Mũ ngakunda naha ølø? Mo oyála anĩ de. Mũ kunda

naha ɔlɔ di? Du lingbangi. Mo ohá ɔlɔ de. ²⁸ Engú bini, i du me mu nde aha ɔlɔ-o, mu mene bhomu-o siti 'ngú de. I du la di me tsa ɔlɔ nde aha bhoko-o, ani mene siti 'ngú de. La-a, yi mbila ndjindji me okpála bhende ngaha olisi ngazu likabhu píla doto naali. Ma akunda la de me yi zu likabhu bhomu-o de.

²⁹ Ondaise ma, ma akunda napa pi yi me, nedhinga inde atigala pi ní-e bedi. Nayie pi mbia inde ngú nanu ne kalanu-o, a ayo me okpála bhende ka o ne olisi du mugito me olisi ka uo ade. ³⁰ Okpála bhende ngaku 'gbá-a mene mugito me uo bhú likabhu ade. Obhende ngamu 'zo-o mene mugito me uo bhú djali ade. Obhende ngakala 'he mene mugito me ehe ka uo ade. ³¹ Obhende ngasia tia na doto inde-e mene mugito me tia ka o ade. Padhá de, anga doto maka i ngau lie lie mbia inde-e, bhúe matá nedhinga bhelé de.

³² Ma akunda me yi adú ne likabhu de. Bhoko bhende i ha ɔlɔ de-e gbite lie li engú gba Ebhe, ani ngagili nanga li Ebhe. ³³ Engú bini, bhoko bhende aha ɔlɔ-o, agbite lie li ongú na doto, ani ngagili namene engú inde anga li wala e. ³⁴ Ani agbo la di busu e li di kulu bhisi. A bhadi moko pi ɔlɔ inde aha bhoko, ani ngagbite lie li 'ngú na doto. Ani ngagili namene engú inde nganga li 'ko e. Engú bini, pi ɔlɔ, i du di-e tsa ɔlɔ bhende i ha nga bhoko de-e, ani ngagbite lie li engú gba Ngámá. Padhá de, anga ani akunda naha lie pi ani bhú ndu 'ngú hana inde ani ngamene e, ne bhende ani ngabhundja e-o.

³⁵ Ma ngapa 'ngú bhomu-o ngubula bádha 'ngú gba yi, ma pa ngubula na'o tili kili li 'ngbu yi de. Engú bini, a ko ngubula me yi mene engú inde ndjindji, amba yi kpata la di Ngámá Yesu ne bua yi hana.

³⁶ La mbia inde-e, i du me makombi bini nde akpe namene siti 'ngú li pabili gba tsa ɔlɔ inde ani abedhe ne gumu naha e, ani bhundja me a ayo me engú angoo kpata kpadji na ndjindji-e, ani de mene maka ani au lie. Ani mene siti 'ngú de. U de ha lio maka li bhoko-o akunda lie-o. ³⁷ Engú bini, i du me makombi-e nde apa me ni ha tsa ɔlɔ bhomu-o de-e, i du me engú angoo nde ayie li bua ani makpe me u nde kata ani tété gandji de-e, ani amene bhadi bádha 'ngú. ³⁸ Bhoko bhende aha tsa ɔlɔ inde nako ani adu nakunda naha e amene bádha 'ngú. Engú bini, bhoko bhende apa nae me ni ha ani de-e, amene bádha 'ngú naali.

Engú pindji oekosi

³⁹ ɔlɔ inde li 'ko e nde bhú ka-a ti da nadu ne bhoko koko de. Engú bini, i du me bhoko angoo nde akpi-e, bhobhomu-o aha kpadji pi ani ngú naha bhoko koko maka ani akunda lie. La-a, a ayo me bhoko angoo du ne makilisito. ⁴⁰ Engú bini, ngama-a, ma abhundja me i du me ani nde adu kpi e kpi-e, ani dú bhú djali nane me ani ha matá bhoko koko. Ma pa mo-o, ma abhundja me Bhobua gba Ebhe-e di bhú ma.

8

Kpadji na imbilangu di ne kpadji na mukunda

¹ Mbia inde-e, ní tsia nga 'ngú pindji so 'nu inde u aha e pi oebhe na eu. A na paká me imbilangu bhú ndu ní hana, maka yi ngapapa lie-o. 'E-e! imbilangu angoo ti da naha pi kpála 'ngbé 'ndji. Engú bini, mukunda nae ngadyudyo ní bhú nabhuka ne kalanu. ² Kpála bhende ngabhundja me ni ambila 'ngú-o mbila nga maka a ayo lie me ani mbila-a de. ³ Engú bini, kpála kunda Ebhe na paká paká-a, Ebhe ambila kpála angoo.

Yi ató ondaise yi bhú ngíta de

⁴ Píndji 'ngú inde atsia so 'nú inde u aha e pí oebhe na eu-o, ní tí da nazuzu, ne me ní tí da nazuzu de? Ní mbíla ndjindji me oebhe na eu ne oehe na kukulu ade. Ní ambíla di me, Ebhe bha koli e bini kpi e kpi. ⁵ A na paká me a abhúlá di ne píla doto ne oehe inde lí okpála ngadhogó o maka oebhe gba o. Ongua oebhe na eu bhomu-o bhelé, u di ngako pí okpála. ⁶ La pí ní-e, ní mbíla ndjindji me koli Ebhe bha bini. A ko 'Dyi ní inde abho ndu 'he hana píla doto. Aní atsia abho di ní me ní du pí ní. Ní la bhadi ne koli Ngámá bini, a ko Yesu Kilisito . Ndu 'he hana ngayie ka aní, ní di ngasia mukobho ka aní.

⁷ Engú bini, i du me ní nde ambíla me mukobho bhú oebhe na eu ade-e, a ne okpála inde imbíla nga kukulu 'ngú ango-o má kpulukutu de. Okpála koko bhú ká yi adu nadhogó oebhe na eu. La mbia inde-e, uo bha ngazu so 'nú ango-o ne nabhundja me oebhe na eu bhomu-o ne angu pépé. Okpála ango-o nga bha bhubhuku lí kpadji gba Ebhe. Abhomu-o, u ngabhundja me so 'nú ango-o ngato o bhú siti 'ngú kala aní. ⁸ Ní mbíla ndjindji me ezú bini tí da nadyudyo ní de Ebhe masikpe de. Belegu ní zu, belegu ní zu de-e, a méne 'ngú bini lí ní de.

⁹ 'E-e! Yi lila liyi me, kpadji inde u aha e pí yi ngú nazu ndu 'he hana-a, a tó okpála bhende bhubhuku bhú nabhuka bhú siti 'ngú de. ¹⁰ Padhá de, anga i du me kpála inde bhubhuku bhú nabhuka nde au mu, ngamu kpála inde ambíla kukulu 'ngú ambíla-a, mu nde ngazu so 'nú inde u abhólo e pí oebhe na eu bhú eti u adhodhogó uo bhú e, mo ombhundja naamu me aní tí da di nazuzu dí? ¹¹ Kaka-a, kpála inde bhubhuku ango-o, ndai mu inde lí Kilisito akpi pí e tsia ngíta ka mu, kabula engú nasisiti inde mo omene e, ngamu kpála ambíla kukulu

'ngú má kpulukutu-o ambila-o! ¹² Namene ngua siti 'ngú bhomu-o li pabili gba ondaise yi-e, di ne na'o eka li bua uo inde nakpokpo kú 'ngú inde bhuhuku bhomu-o, a ko namene siti 'ngú li Kilisito ngae makpe. ¹³ Kaka-a, i du me ezu bini nde ngato ndai ma bhú siti 'ngú-o, ma zú matá ezu ango-o de, amba ndai ma atí bhú siti 'ngú ka ma de.

9

Lele li Polo adu nakpokpo Bádha Ngali gba Yesu Kilisito lie-o

¹ Ngama-a, ma ti da nasia ndu 'he hana maka suka obhulu titima gba Ngámá gba ní Yesu Kilisito di? Ngama-a, ma u ani ne djila ma makpe di? Ngayi-e, yi bhuka ani ka kulu gba ani inde ma amene e bhú ka yi-e di? ² Belegu li okpála koko ziba de me ma ne suka obhulu titima gba Yesu-o di-e, la pi yi-e, ma ne bhulu titima gba ani. Padhá de, anga nau me yi akpøtsø liyi ne Ngámá-a asuno na paká me, ma ne bhulu titima gba ani, anga ma akpokpo Bádha Ngali-e pi yi ngama.

³ Eli inde ma agie e pi okpála inde ngapa 'ngú li ma sisiti-e ngae inde: ⁴ A ayo di de me ya sia ezu di ne ehe nandji mandji kabula kulu inde ya ngamene e di? ⁵ Yi abhundja naayi me li ya ha øø inde makilisito me ya du nadhuku bhú dabili bini ne ani maka Piele ne obhulu titima koko gba Yesu, di ne ondaise Yesu-o, amba ko siti 'ngú? ⁶ Yi abhundja naayi me, okpála inde a ayo me u mene kulu ne 'kpa o ngu nakobho ka o-o bha ne ya ne Balabasi? ⁷ Kpála inde bhú kulu na sudha-a haha makalá gba e pi e ngae makpe uu? Belegu de bini. Li kpála lu edyi-e, ani zuzu ezu ango-o di, i du me kpála nde ngalila enu-o, ani ndjindji miliki na 'ka 'nu ango-o di?

⁸ Ongú inde ma apa e bhomu-o, a ko bha bini bhende li okpála ngabhundja e ngao-o de. U aye bhadi bhú líli gba Moidje-e moko. ⁹ Padhá de, anga u aye bhú líli angoo me: «† du me bagala nde ngatu ngano-o, mo ogbíte 'bhø aní de. 'O me aní zu mbo té ngano angoo uu.†» Yi abhundja naayi me Ebhe apa 'ngú bhomu-o bha bini pi obagala? A mo-o ade. ¹⁰ Ebhe apa 'ngú bhomu-o pi ní makpe adi? A na paká me aní apa pi ní. Padhá de, anga kpála inde ngalu 'dyi-e nga'o 'to e lí ezú inde aní asía e-o. A bhadi ndjindji me kpála bhende nga'e nguwa abhiye-e sia té nguwa angoo.

¹¹ Ya akpokpo Bádha Ngali pi yi maka u alulu nguwa lie abhiye-o. † du la me yi nde ateteke ya ne tia na doto-o, amba a ko siti 'ngú? ¹² † du me okpála koko nde ngasia tia na doto ka yi-e, ka ni ngaya-a, ya ti da nasisia ka yi lie de-e? Engú bini, ya tsia yo ehe ka yi de. Ya ngakibila ndu likabhu hana inde ngakolo li kute ya-a, anga ya kunda namene engú inde i ní kpadji pi okpála me u adjé Bádha Ngali gba Yesu Kilisito-o de-e de.

¹³ Yi mbila de me okpála inde ngamene kulu bhú 'ngbé 'ti Ebhe-e ngasia ezú gba o bhú kulu inde u ngamene e adi? Obhende ngatsulu enu pi Ebhe-e ngasia tété ngú nazuzu adi? ¹⁴ A bhadi moko pi okpála bhende ngakpokpo Bádha Ngali-o. Ngámá gba ní-e apa me, okpála inde ngakpokpo Bádha Ngali-e, akóbho bhadi li Bádha Ngali.†

¹⁵ Engú bini, belegu inde lie mo-o, ngama-a, ma yo ehe bini ka yi de. Ma pa pi yi de me, ma aye balua inde-e pi yi me yi tima 'he muma-a de. A ndjindji muma naali me ma kpi ne gumu! A ayo de me kpála bhølø engú inde

† 9:9 9:9 Tsia bhú Det. 25:4; di ne bhú 1 Tim. 5:18. † 9:14 9:14 Tsia bhú Luk. 10:7; di ne bhú Mat. 10:10.

ma nde ne gindaginda ka e de. ¹⁶ Nakpokpo Bádha Ngali ma ngakpokpo e-e ha kpadji muma de me 'ndji ma be-e de. Padhá de, anga Ebhe ngae makpe apa muma me ma kpokpo Bádha Ngali ang-o. A moko, a ko likabhu muma i du me ma nde kpokpo Bádha Ngali-e de ko. ¹⁷ I dú nani me ma alo kulu ang-o ngama-a, a de adú ndjindji me u ha makalá muma tété. A la mo-o ade. Ma lo kulu ang-o ngama makpe de. Ma ngamemene anga Ebhe a'o kulu ang-o sakpa ma. ¹⁸ Makalá ma ngasia e li kulu ang-o ne ni? Makalá gba ma ne nakpokpo Bádha Ngali-e mandí nayo 'he. Maka kpála nakpokpo Bádha Ngali-e, ma ti da nayo 'he ka yi, la-a ma yó ehe bini de.

Polo ateteke kpála ne kpála bhú dasundu gba e ngú nabhuka Ngámá Yesu

¹⁹ Ma bhú ngu ma, ma ne bali gba kpála bini ade. La-a, ma atsia a'o lima bali gba ndu okpála hana, ngubula me ma sia okpála bhelé ngú nabhuka Ngámá Yesu. ²⁰ Li ma du bhú ká omaYuda-a, ma dú maka uo ngubula me ma teteke uo ngú nabhuka Ngámá Yesu. Ma ambila ndjindji me líli gba Moidje ne angu pí ma ade. Engú bini, i du me ma nde bhú ká okpála inde ngamene líli ang-o, ma améne mugito me ma sa líli ang-o ngubula me ma teteke uo ngú nabhuka Ngámá Yesu.

²¹ Li ma du bhú ká okpála bhende i mbila líli gba Moidje de-e, ma adú bhadi maka uo ngubula me ma teteke uo ngú nabhuka di Ngámá Yesu. Bhobhomu-o kunda napa de me ma mene líli gba Ebhe de-e de. Ma ngamemene anga ma ngamene líli gba Ngámá Yesu Kilisito. ²² Li ma du bhú ka okpála inde bhubhuku li kpadji gba Ebhe-e, li ma 'ó di lima bhubhuku ngú nateteke uo ngubula me u kolo kpekpeke bhú nabhuka

Ngámá Yesu. Belegu li okpála du lele pi-ie, i du me ma nde akolo bhú ká uo-o, ma dú bhadi maka uo ngubula me ma teteke okpála koko bhú ká uo ngú nabhuka Ngámá Yesu, amba u kobho. ²³ Ma ngamene ndu 'ngú bhomu-o hana ngubula me Bádha Ngali-e nu ne kalanu, amba Ebhe tuko bisagu pí ma bhú kulu ango-o.

A ayo natsia 'kpí lio ndjindji bhú nabhuka

²⁴ Yi mbila de me, okpála inde agugu holo-o, u dudu okpála bhelé, engú bini kpála bhende akokoto kalanu-o sisia makalá ngae. Yi mene ne kpéke maka okpála inde ngagu holo, amba yi sia di makalá. ²⁵ Ndu okpála hana inde agugu holo-o dudu sa líli nakpekpeke. U ngamene mo-o ngubula nasia makalá. La-a, makalá ango-o bhúe de. Engú bini nganí-e, ní ngamene ngubula nasia makalá inde adú dudu ma ne dudu ma. ²⁶ Kaka-a ngama-a, ma ngagu holo ngangá ade. Ma la di maka kpála inde ngagu gbele me ani nde ngatsia 'kpí lie ndjindji. ²⁷ Ma ngamene kute ma kpekpeke ngú napa me kute ma mene líli gba ma-o, amba li sokpí-e, Ebhe abhíke ma de, pita nakpokpo Bádha Ngali pí okpála koko-o.

10

Yi lila liyi ka nale-e malila

¹ Ondaise ma, ma ngagbele 'dje yi mo-o, ngubula me yi bhundja nga matá engú inde akolo nani li onguo ogbi ní bhú nedhinga u adu adhuku lie nganda Moidje-o. † Ebhe abuku nani ndu uo hana ne ndindi ngú nalila uo. Ndu uo hana agulu nani 'ngbé 'ngu na Mbembe. ² Nabuku uo ne ndindi ne nakodho 'kpí ka uo bhú 'ngu-o amana mugito me Ebhe aha pí uo bhomu-o Batisimo, ngubula

† 10:1 10:1 Tsia bhú Eki. 13:21-22, 14:19-29.

me u kpɔtsɔ lio bini ne Moidje. ³ Ndu uo hana azu ezu inde adu ayie ka Ebhe.† ⁴ Ndu uo hana andji engu inde adu akoto bhú teme. Teme ang-o, a ko kulu Yesu Kilisito inde adu adhuku ne uo bhú dabili bini-o. ⁵ La-a, belegu u au ongamba 'ngú bhomu-o lie hana-a, okpála bhelé bhú ká uo du amene engú inde anga li Ebhe-e de. Kaka-a, u amu, u atsia atigala bhú 'gu.†

⁶ Ongú bhomu-o ngasuno pi ní me, ní adú ne gumu namene siti 'ngú maka onguo ogbi ní de.† ⁷ Yi ayó oebhe na eu maka okoko bhú ká uo amene nani lie de. Padhá de, anga u aye bhú Bhuku gba Ebhe-e me: «Okpála adulu kuto ngubula nazu anokomia. Pipita-a, u atsia ayie bhú lá ngú nadho 'bi kala kulu ebhe na eu.†» ⁸ Okpála koko bhú ká uo adu adhuku ne olisi ngangá. Kaka-a, okpála kɔtɔ ndjikpa bhisi ne ká bata atsia amu bhú koli 'kpí bini. Pi ní-e, ní améne maka uo de.† ⁹ Okpála koko bhú ká uo ale Ngámá. Kaka-a, okpulu adolo uo má bi bi bi, uo atsia amu. Pi ní-e, ní améne maka uo de.† ¹⁰ Okpála koko bhú ká uo adu adi mutokono li Ebhe. Kaka-a, andjelu gba Ebhe inde abhɔbhɔ kpála-a, a atsia ago abhili uo. Pi yi-e, yi adí mutokono li Ebhe maka uo de.†

¹¹ Ndu ongú bhomu-o hana akolo li uo ngubula nateteke okpála koko me u améne maka uo de. U aye ongú ang-o bhú Bhuku gba Ebhe ngubula me asuno kpadji pi ní, nganí inde ngakobho li sokpí-o. ¹² Kaka-a, kpála bhende ngabhundja me ni alu bhú nabhuka kpekpeke-e lila lie ndjindji me ni atí-i de. ¹³ Nale inde ngabhaka yi-

† 10:3 10:3 Tsia bhú Eki. 16:35. † 10:5 10:5 Tsia bhú Nom. 14:16, 29-30. † 10:6 10:6 Tsia bhú Nom. 11:4, 34. † 10:7 10:7 Tsia bhú Eki. 32:6. † 10:8 10:8 Tsia bhú Nom. 25:1-18. † 10:9 10:9 Tsia bhú Nom. 21:5-6. † 10:10 10:10 Tsia bhú Nom. 17:6-14.

e, a ko nale inde ngakolo bha li ndu okpála hana. Ebhe atéteke yi maka ani apa lie-o. Ani ti da naka kpadji de me engú inde akólo li yi-e ha angu yi-e de. Engú bini, i du me nale nde akolo li yi-e, Ebhe há angu pi yi ngú nakikibila. Ani tsia téteke yi me yi atí-i de.

Yi lila liyi ka oebhe na eu-o malila

¹⁴ Kaka-a, ondaise ma na mukunda, yi 'o nadhogö oebhe na eu ma'o. ¹⁵ Ma ngagama 'ngú pi yi maka okpála na imbilangú. Yi aló doto bhú 'ngú ma ngapa e ngayi makpe. ¹⁶ Nedhinga ní adulu lie pí misa gba Ngámá-a bhú dabili bini-e, ní ngandji vino inde ní ngagie heni pi Ebhe ngú e-o. Ní akpötsö liní bhomu-o ne Yesu Kilisito bhú ngute e. Li ní gumu mapa-a ngú nazuzu-o, ní akpötsö bhomu-o liní bhú kute Yesu Kilisito. ¹⁷ Koli mapa-a bha bini. Belegu ní nde lie bhelé-e, ndu ní hana ní ngazu koli mapa bini bhomu. Bhobhomu-o ngasuno me ní akpötsö liní, ní akolo bini.

¹⁸ Yi bhundja nga okpála na tsalaele. Nedhinga u ngazu enu inde u aha e pi Ebhe lie, u akpötsö lio bhomu bhú dabili bini ne Ebhe inde u aha enu bhomu-o pi e-o. A mo-o adi? ¹⁹ Ma akunda napa bhomu-o pi? Ma akunda napa me, ebhe na eu di ne enu inde u ha e pi ani-e, a ne tata? ²⁰ A mo-o ade. Ma apa mangbo me, li okpála bhende imbila Ebhe de-e du naha 'he bhú 'ti oebhe gba o-o, u haha pi odjabulu. U haha pi Ebhe de. La-a, ma kunda de me yi kpötsö liyi ne odjabulu-o de. ²¹ Yi ti da nandji vino bhú kópo gba Ngámá Yesu, yi tsia ndjí di bhú bhende gba odjabulu-o de. Yi ti da nazu 'he pí misa gba Ngámá, yi tsia zu di pí misa gba odjabulu-o de. ²² Yi abhundja me ní kpekpeke ane Ngámá-a? Ní akunda me bua ani ke ne ní?

Yi mene ndu 'ngú hana ngubula nadhogø Ebhe

²³ Okpála koko bhú ká yi ngapa me: «Ya ne omakilisito, ya ti da namene ndu 'ngú hana.» A na paká, engú bini, ongú koko ti da nateteke ní de. Yi ngapa me: «Ní ti da namene ndu 'ngú hana.» La-a, ongú koko ti da namene de me okpála koko bhele li kpadji gba Ebhe-e de. ²⁴ A ayo de me kpála 'o bha 'to e 'to e makpe de, engú bini, a ayo me ani 'o di 'to e 'to okpála koko.

²⁵ Yi ti da nazu ndu enu hana inde u ngatsindji e bhú daposi me yi nde yi 'ngú tété de kabula bua nakpokpo ku 'ngú gba yi-o. ²⁶ Padhá de, anga Bhuku gba Ebhe-e apa me: «Doto ne ndu 'he inde bhúbhú-o hana ne tia ka Ngámá.†»

²⁷ I du me mupagano nde a'i mu agba e ngú nazu 'he-e, i du me mu nde akunda nanu-o, li mu kolo-o, mu de zu ndu 'he hana u ahá e pi mu-o, mo oyí 'ngú bini de kabula bua nakpokpo ku 'ngú gba mu-o. ²⁸ La-a, i du me kpála nde apa pi mu me enu inde mu ngazu e bhomu-o, a ko enu inde u aha e pi oebhe na eu-o, mo ozú-u de, amba bua nakpokpo kú 'ngú gba kpála inde apa 'ngú ango-o pi mu-o asíti de. ²⁹ Ma ngapa 'ngú bhomu-o pindji 'ngú inde li kpála bhomu-o ti da nabhundja e li bua nakpokpo kú 'ngú gba e-o. Ma pa ngubula bua nakpokpo kú 'ngú gba mu-o de. Ka ni ma améne 'ngú lie li lele mabhundja gba kpála koko, ma nde mene mangbo maka ma ngabhundja lie ngama makpe-e di-e? ³⁰ I du me ma nde agie heni pi Ebhe ngubula ezu-o, ka ni li kpála koko nga uu lie sisiti-e?

³¹ Abhomu-o, i du me yi nde ngazu 'he, i du di-e me yi nde ngandji 'he nandji mandji, i du di-e me yi nde ngamene mangua 'ngú koko dho i-e, yi de mene ndu 'ngú bhomu-o hana ngú nadhogø 'li Ebhe. ³² Yi améne engú

† 10:26 10:26 Tsia bhú Ets. 24:1.

inde li okpála koko ti da nati ka e de, abana omaYuda, abana obhende ne omaYuda ade, abana okpála na Piga gba Ebhe. ³³Ngama-a, ma bhadi ngamene mo-o. Ndu 'ngú ma ngamene e hana, ma ngamemene me a nga li ndu okpála hana. Ma bha ngabhundja engú inde atéteke ma-a ade. Ma ngabhundja mangbo pindji engú inde i ti da nateteke okpála bhelé, amba Ebhe kobho uo.

11

¹Yi kpata engú inde ma ngamene e maka ma ngakpata bhende gba Kilisito lie-o.

Lele nadu ka obhosi di ne olisi bhú nedhinga nayo Ebhe

²Ma ngaha apepe pi yi, anga yi ngabhundja ma bhú ndu 'ngú hana. Yi la di ngamene olíli gba omabhuka inde ma asuno e pi yi-o. ³La-a, ma akunda me yi mbila engú inde: Kilisito ne Ngámá pí 'ndji bhoko. Bhoko ne ngámá pí 'ndji 00. Ebhe ne Ngámá pí 'ndji Yesu Kilisito. ⁴I du me bhú nedhinga nayo Ebhe, li bhoko du nayo Ebhe, ani du di-e nakpokpo eli inde ani asia e ka Ebhe me ani nde adyi ndata-a, amba ani ngaha bhomu-o numu pi Ngámá gba e-o. ⁵Engú bini, i du me bhú nedhinga na mayo-o, li 00 'o 'ndji e padhá li nedhinga ani ngayo Ebhe lie, i du di-e li nedhinga ani ngakpokpo eli inde ani asia e ka Ebhe-e lie-e, 00 ango-o ngaha numu pi ngámá gba e-o. Ani maka 00 inde aka 'ndji e maka. ⁶I du me 00 nde ga kitambala bhú 'ndji e de-e, amana mugito bhomu-o me ani aka 'ndji e maka. I nde la lie me a nde numu pi 00 ngú naka 'ndji e ndundundu, i du di-e ma ngbidhidhi-e, a ayo me ani ga kitambala bhú 'ndji e.

⁷ La pi bhoko nedhinga ani ngayo Ebhe lie-e, a ayo de me ani dyi ndata-a de, anga Ebhe abho ani li kulu e. Ani ngasuno sangu gba Ebhe. La pi 00-o, ani ngasuno sangu gba bhoko. ⁸ Yi mbila ndjindji me, Ebhe bho gina bhoko li 00 de, engu bini ani abho mangbo gina 00 li bhoko. ⁹ La di-e, Ebhe bho bhoko pi 00 de, ani abho mangbo 00 pi bhoko. ¹⁰ Kaka-a, i nde lie me Ebhe abho 00 mo-o, a ayo me ani ga kitambala bhú 'ndji e ngu nasuno me ani ti da nayo Ebhe, amba oandjelu mbila me ndu 'ngu hana li lelele.

¹¹ Ni mbila ndjindji me kala Ngamá-a, olisi ne gumu obhosi, obhosi la di ne gumu olisi. ¹² Padhá de, anga maka u abho nani 00 lie li bhoko-o, a bhadi moko a ngazu bhoko ne 00, la di-e, ndu 'he hana ngayie ka Ebhe.

¹³ Yi pa nga ngayi, a pi 00 ndjindji nayo Ebhe me ani nde buku 'ndji e di? ¹⁴ Ndu okpála na píla doto hana mbila ndjindji me a ko numu pi bhoko ngu na'o sundjo e ndjandjandja. ¹⁵ La pi 00-o, ndjandja sundjo-o, a ko bádha 'ngu naali. Padhá de, anga Ebhe aha nani sundjo pi 00 ngu nabuku 'ndji e ne di. ¹⁶ I du me kpála nde akunda nabi bhayiki li 'ngu bhomu-o, a ayo me ani mbila me lele dasundu gba ní-e ngae bhomu. Piga gba Ebhe-e alu la bhadi pí 'ngu bini bhomu.

Polo agbele 'dje omabhuka li lele nazu komonyo

(*Tsia bhú* Mat. 26:26-29; ne bhú Mlk. 14:22-25; di ne bhú Luk. 22:15-20.)

¹⁷ Ni kodho 'kpi li 'ngu koko. Ma ti da nadhogø yi tété de. Padhá de, anga nedhinga yi ngakpøtø liyi lie ngu nayo Ebhe-e, engu yi ngamene e ngagie mangbo yi ne sidi. A dyudyo yi ne kalanu de. ¹⁸ Na bini-e, u apa muuma me nedhinga yi ngakø liyi lie bhú dabili bini-e, yi ngagbogbo bhusu yi. Ma abhundja me a ti la bhadi

nadu moko. ¹⁹ A ayo la bhadi me nagbo bhusu o du bhú ká yi, amba okpála mbila obhende ngakpata Yesu Kilisito ne bua o bini-o. A mo-o adi! ²⁰ Nedhinga yi ngakpøtsø liyi lie ngú nazu ezu gba Ngámá-a, yi ngabhundja ani bhúbhú ade. ²¹ Okpála koko bha bini ngagbene lio ngú nazu 'he gba o makpe. Ka 'ngú ango-o, okoko ngalangba, okoko la ngadulu gumu. ²² Gbágbá li yi ade ngú nazu 'he di ne ngú nandji pandi tété-e? Ne me yi ngau Dadjua gba Ebhe-e padhá. Yi atsia akunda naha numu pi okpála inde li ehe nde ka o ade. Yi nga'o 'to yi me ma pá pi yi pi? Ma adhégø yi lele pi me yi ngamene bádha 'ngú-o? A mo-o ade. Ma adhégø yi tété de.

Lele nazu komonyo

²³ Ongú inde ma asuno e pi yi ngama makpe-e, ma asia ka Ngámá Yesu. Engú ango-o me: sukpe inde u adji apú ani lie pi obhulu yala-a, Ngámá Yesu aha mapa, ²⁴ ani agie heni pi Ebhe, ani agugumu, ani atsia apa me: «A inde-e kute ma inde ma aha e pi yi-o. Yi du amene me-e, ngú nakina ma.» ²⁵ Pita u andjia nazu 'he-e lie, ani aha bhadi kópo na vino moko. Ani atsia apa me: «Vino inde-e, ngasuno gandja na mbia inde li Ebhe akodho e ne yi-o. Gandja ango-o alu pí ngute ma. Ndu nedhinga hana inde yi adú andjindji lie, yi du andjindji ngú nakina ma.» ²⁶ Li bili bhomu-o, Ngámá Yesu akunda napa me: ndu nedhinga hana inde yi azú mapa lie di ne nedhinga inde yi andjí vino lie mo-o, yi bhomu-o ngakpokpo pi okpála mbámbá nakpi ka ani akolo li 'kpí inde ani agie lie lie-o.

²⁷ Kaka-a, kpála inde azú mapa gba Ngámá Yesu, inde andjí la di vino gba ani-e li lelele de-e, asia mangimbo anga ani andjo kute Ngámá Yesu, ani atsia andjo di ngute ani. ²⁸ A ayo me kpála ne kpála tsia lie makpe ngae bhubhulu, amba pipita-a, ani tsia zu mapa, amba ani

ndji di vino gba ani-o. ²⁹ Padhá de, anga li kpála zu mapa gba Ngámá Yesu, ani tsia ndji di vino gba ani-e me ani nde ngauu maka i de ehe na padhá-a, ani bhomu-o ngagbele mangimbo pí e ngae makpe. ³⁰ A bhomu-o, engú inde yi ngau ka e me okpála bhelé bhú ká yi ne kuo, okoko bhuhuku, la di-e, okoko bhelé amu. ³¹ I dú me ní dú atsia bua ní nganí makpe kala nazuzu-o, Ngámá de kódho 'ngú gba ní-e de. ³² Engú bini, Ngámá ngakodho 'ngú gba ní-o, ani di ngalili ní ngubula me ani a'ó galikpe engú pí 'ndji ní bhú dabili bini ne pí 'ndji okpála koko de.

³³ Ka 'ngú angu-o, ondaise ma, nedhinga yi ngakpøtø liyi lie ngú nazu ezu gba Ngámá-a, yi dje liyi sunda yi. ³⁴ I du me suka yi nde ne gumu-o, a ayo me ani zu ngaiza 'he agba e, ngubula me yi agbéle mangimbo gba Ebhe-e pí yi de bhú nakpøtø lie gba yi-o. Pindji ongu koko inde yi ayi e-e, ma agie 'ngú pi yi pépé nedhinga ma akólo lie agba yi-o.

12

Angu inde li Bu Bhobua ngaha e pi kpála ne kpála ngú nateteke Piga gba Ebhe-o

¹ Ondaise ma, pindji engú bhende atsia angu li Bu Bhobua ngaha e pi kpála ne kpála ngú nateteke Piga gba Ebhe-e, ma akunda me yi mbila 'ngú tété. ² Yi mbila ndjindji me nedhinga yi adu nga lie ne omupagano-o, osisiti bua adu agbele yi li pápá gba oebhe na eu inde i gama 'ngú de-o. U atsia amba bhúla yi li okpadji ngangá. ³ Kaka-a, ma apa pi yi mbámbá lele nambila me kpála ngagama 'ngú bhú angu gba Bu Bhobua. Kpála du nagama 'ngú bhú angu gba Bu Bhobua-a, ani ti da napa de me a ayo me u tu pødjø li Yesu-o de. Engú bini, li

kpála pa me: «Yesu ne Ngámá-a», a akunda napa me Bu Bhobua akata aní ngae.

⁴ Angu lí Bu Bhobua ngaha e pí kpála ne kpála ngú nateteke Piga gba Ebhe-e kpi kpi kpi, la-a, ngaani Bu Bhobua inde ngaha angu ang-o, koli aní bha bini má kpikili! ⁵ Ní tí da namene kulu pí Ngámá Yesu lí okpadji ngangá, la-a, ngaani Ngámá Yesu inde ní ngamene kulu ang-o pí e-e, koli aní bha bini má kpikili! ⁶ Ebhe ngaha angu pí okpála kpikpikpi ngú namene kulu gba aní-e ne di. La-a, Ebhe bhulu naha angu bhomu-o pí okpála-a, koli aní bha bini má kpikili!

⁷ Angu gba Bu Bhobua-a ngasuno lie bhú kpála ne kpála ngubula me aní teteke okpála koko ne angu ang-o. ⁸ Bu Bhobua ngaha pí okpála koko-o angu nagama 'ngú ne imbilangu. Pí okpála koko-o, Bu Bhobua bini bhomu-o ngaha angu nasuno 'ngú gba Ebhe-e pí okpála. ⁹ Bu Bhobua bini bhomu-o ngaha pí okpála koko angu nadu ne nabhuka na kpekpeke. Koli Bu Bhobua bini bhomu-o ngaha pí okpála koko angu nadu nakobho okuo lí okpála. ¹⁰ Bu Bhobua ngaha pí okpála koko angu namene ongamba 'ngú . Pí okoko-o, aní ngaha angu nakpokpo engú maka opolofeta . Pí okoko-o, aní ngaha angu nambila nagbogbo bhusu osisiti bua ne Bu Bhobua. Pí okoko-o, aní ngaha angu nagama 'ngú bhú eli gba oandjelu. Pí okoko-o, aní ngaha angu nambamba tata. ¹¹ Ndu 'ngú bhomu-o hana ngayie ka koli Bu Bhobua bini. Aní ngaha pí kpála bini ne bini angu maka aní akunda lie.

Piga gba Ebhe-e maka kute kpála inde ne oyáyá lie bhelé

¹² Kute Yesu Kilisito maka kute kpála-kuti inde lí oyáyá nde lie bhelé. Mu tsia 'lá kpála-kuti-e, yáyá lí aní bhelé, kute aní la bha koli e bini má kpikili! Abana lí yá kpála nde lie bhelé-e, ndundu hana amene bha koli kute

bini. ¹³ Ndu ní hana, abana omaYuda ne okpála inde ne omaYuda ade, abana okpála inde bhú bali ne obhende bhú ngu o, ndu ní hana ní asia nani batisimo ngu napa me ní kolo maka kute bini li kpadji gba Bu Bhobua bini. Ndu ní hana, ní atsia asia bhadi angu gba Bu Bhobua bhomu-o.

¹⁴ Mu tsia kute kpála-kuti-e, oyáyá tété bhelé, a bha koli e bini ade. ¹⁵ Li 'dhu kpála pa me: «Ma ne yá kpála ade anga ma nde ne kpele kpála ade-e», a ko de me ani ayé yá kpála kaka-a de. ¹⁶ Li 'dje kpála pa me: «Ma ne yá kpála ade, anga ma ne djila kpála ade-e», a ko de me ani ayé yá kpála kaka-a de. ¹⁷ I du me 'lá kpála-kuti libhomu du bha ne djila-a, kpála de adú nadje 'kpí lele pí? I du di me 'lá kpála-kuti libhomu nde bha ne edje-e, kpála de adú nadje se 'he lele pí? ¹⁸ A na paká me Ebhe a'o nani oyá kpála-kuti maka ani akunda lie. ¹⁹ I dú me Ebhe 'ó nani li kpála bha koli yáyá bini-e, u de 'í de me a ko kpála-kuti-e de. ²⁰ Engú bini, a mo-o ade. Oyáyá li kute koli kpála bini-e bhelé.

²¹ Kaka-a, djila ti da napa pi ekpa de me: «Ma ne gumu mu ade-e de.» La di-e, endji ti da napa pi odhu de me: «Ma ne gumu yi ade-e de.» ²² Engú bini, oyá kpála bhende ní ngau e me abhubhuku-o, pi ní ne tata. ²³ Obhe ní ngau e me tata tété naali ade-e, ní ngalilila nane okoko mane. Obhe ní ngadje numu li napa 'ngú o-o, ní ngatsia 'kpí tété ndjindji. ²⁴ Oyá ní bhe li numu nde li ní lie ade-e, ní nga'o 'to ní tété naali ade. Engú bini, Ebhe abho 'lá kpála-kuti da napa me ní du atsia 'kpí li oyá ní bhe nga'o numu li ní-e ndjindji. ²⁵ Ani amene mo-o ngubula me nagbo bhusu o adú bhú kute ní de, engú bini, oyá ní hana du nateteke lio sunda o. ²⁶ I du me yá kpála bini nde ngazu likabhu-o, ndu okoko hana ngazu

likabhu bhú dabilì bini ne anì. I du me u nde ngadhogè yá kpála-kuti bini-e, ndu okoko hana ngakpi ndjilì ne anì bhú dabilì bini.

²⁷ Pì yi-e, yi ndu yi hana ne kute Kilisito, akunda napa me, yi ne oyá anì. Kpála ne kpála ne da e bhú kute Yesu Kilisito. ²⁸ Kaka-a, bhú Piga gba Ebhe-e, Ebhe a'o ngaiza na bini obhulu titima gba Yesu , na bhisi-e, anì a'o okpála bhende ngakpokpo 'ngú maka opolofeta, na bata anì a'o omusuno. Pipita-a, anì a'o okpála inde ngamene ongamba 'ngú. Pipita-a, anì a'o okpála bhende ngakobho obhulu kuo. Ebhe atsia aha di angu pì okpála koko ngú natsia 'kpí lí obi o di ne nateteke uo. Anì a'o okpála inde ngasuno kpadjì pì okpála koko. Anì atsia aha di angu pì okpála ngú nagama 'ngú bhú oeli gba oandjelu.

²⁹ Ndu okpála hana ne obhulu titima gba Yesu? Ndu okpála hana ne okpála nakpokpo 'ngú maka opolofeta? Ndu okpála hana ne omusuno? Ndu okpála hana ne angu namene ngamba 'ngú? ³⁰ Ndu okpála hana di ne angu ngú nakobho okpála na kuo? Ndu okpála hana di ne angu ngú nagama 'ngú bhú oeli gba oandjelu? Ndu okpála hana di ne angu ngú nambamba ta 'ngú? ³¹ Kaka-a, a ayo me yi bedhe ne gumu namene ongú inde lie ne tata ngú nateteke okpála koko.

Mbia inde-e, ma adjì asuno pì yi kpadjì inde ane okoko ne bádha ngubula me yi teteke Piga gba Ebhe-e tete.

13

Polo akpo 'ngú pindjì mukunda bhú Piga gba Ebhe

¹ Abana i du me ma nde ne angu nadi ndu eli gba okpála hana, i du di-e bhe gba oandjelu , i du me mukunda nde bhú ma ade-e, ma bha bini maka mangbou inde lí gili e ngau, i du di-e mbulu ngbongbó inde lí gili

e ngau kpekpeke. ² I du me ma nde ne angu nakpokpo 'ngú maka polofeta , i du me ma nde ne imbilangu na ndu ongu hana, i du me ma nde ne angu nak mboli ndu ongu li Ebhe awo e mawo, i du me ma nde di ne nabhuka inde i ti da napa me ma 'e ne di eta, i du la me mukunda nde bhú ma ade-e, ma ne ehe na padhá. ³ I du me ma nde apu ndu 'he gba ma-a hana pi obhulu ndibhili, i du me ma nde atse belegu kute ma me u tsulu bhú djua, i du la me mukunda nde bhú ma ade-e, bhobhomu-o ne tata pi ma ade.

⁴ Kpála inde ne mukunda pi obi e-e, bua ani ndjándjá, ani di ngamene babadha 'ngú pi obi e. Ani ne 'ngbé bua li 'he gba okpála koko ade, a ko pa 'li e de, ani di ne 'ngbé 'ndji ade. ⁵ Kpála inde ne mukunda pi obi e méne engú na numu de. Ani bhúndja bha bini engú gba e kpi e kpi de. Ani ké di 'ngú lie de. Ani gbíte di bua e pi obi e de. ⁶ Kpála inde ne mukunda pi obi e kpí djali li siti 'ngú de. Ani ngakpi mangbo djali li bádha 'ngú. ⁷ Kpála inde ne mukunda pi obi e ngakibila ndu 'ngú hana li okpála amene e li ani-o. Ani ngabhuka ndu 'ngú hana, ani nga'o 'to e ndu nedhinga hana 'to Ebhe, ani di ngagbite bua e ka ndu 'ngú hana magbite.

⁸ Mukunda ndjía 'kpí bini de. La-a, nedhinga akolo makolo li ongu inde li okpála ngakpokpo e maka opolofeta andjía mandjia. Nagama 'ngú bhú oeli gba oandjelu-o andjía mandjia. Angu nasuno 'ngú gba Ebhe-e pi okpála-a andjía mandjia. ⁹ Padhá de, anga angu nasuno 'ngú gba Ebhe-e pi okpála píla doto akódho 'kpí makodho. La di-e, angu gba ní nakpokpo 'ngú maka opolofeta akódho 'kpí makodho. ¹⁰ Engú bini, ekpí li Ebhe ambamba ta ongu na babadha pi ní lie, li ongu bhende libhomu ade-e tsia ndjía.

¹¹ Nani ma adu lie bhú ndili-e, ma adu agama 'ngú maka ndili, ma adu abhundja maka ndili, ma adu di akø mboli 'ngú maka ndili. Engú bini, nedhinga ma abhele lie, ma a'o namene engú bhe na ndili-o. ¹² A la bhadi pi ní moko. Bhú mbia inde-e, ní ngau ohe bulusu bulusu mugito me ní ngatsia 'kpí bhú bitolobi bhende na didili. Engú bini, ekpí akólo makolo ní aú ndu 'he hana má ngilili ne djila ní! Bhú mbia inde-e, imbilangu gba ma-a mbila ndu 'ngú hana de. Engú bini, ekpí akólo makolo ma tsia mbíla ndu 'ngú hana má ngilili maka Ebhe ambila ma lie ngae makpe-o!

¹³ Ngú nabu tata-a, ní mbila me ongu bata inde-e yé bhú da o de. Ongú ang-o ngae inde: nabhuka Ebhe, na'o 'to o 'to ani, a la di-e nadu ne mukunda pi ani di ne pi obi o. La-a, bhú káká hana-a, nadu ne mukunda pi Ebhe di ne pi obi o, ane ndu obhe bhisi bhomu-o hana.

14

Nakpokpo 'ngú maka polofeta ane nakpokpo 'ngú bhú oeli gba oandjelu

¹ Yi mene ne kpéke me yi du ne mukunda pi obi yi. Yi du ne gumu angu li Bu Bhobua ngaha e pi kpála ne kpála ngú nateteke Piga gba Ebhe-o, ane la mane angu nakpokpo 'ngú maka polofeta . ² Kpála inde ngakpokpo 'ngú bhú oeli gba oandjelu ngakpokpokpo pi Ebhe. Ani kpo pi okpála de, anga kpála bini kø mboli engú ani ngakpokpo e de. Ani ngakpokpo bhú angu gba Bu Bhobua ta ongu inde li Ebhe awo ta e mawo-o.

³ Engú bini, kpála inde ngakpokpo 'ngú maka polofeta-a, ngakpokpokpo pi okpála ngubula nabe ndu nabhuka gba uo-o, ngú nato masi bhú uo di ne ngú nateteke bua uo. ⁴ Kpála inde ngagama 'ngú bhú eli gba oandjelu-o

ngabe ndu nabhuka gba e kpi e kpi. Engú bini, kpála inde ngakpokpo 'ngú maka polofeta bhú oeli lí ndu okpála hana ngadje e-e, ngabe ndu nabhuka gba okpála na Piga gba Ebhe-e libhomu. ⁵ Ma ne gumu me ndu yi hana yi du nagama 'ngú bhú oeli u mbila e de. La-a, a nga matá lí ma naali me yi du nakpokpo ongú maka opolofeta. Padhá de, anga kpála du nakpokpo 'ngú bhú oeli gba oandjelu-o, a ayo me kpála koko du ngú nambamba tata. † du mo-o de-e, kpála bhende ngakpokpo 'ngú maka polofeta ngabe ndu nabhuka gba okpála na Piga gba Ebhe-e libhomu ane mane.

⁶ Ondaise ma, ma yi nga yi: † du me ma nde ago agba yi, ma nde ngagama 'ngú pí yi bhú oeli gba oandjelu-o, tata pí yi tété ne ní? Tata bini ade. A ayo mangbo me ma go kpokpo 'ngú pí yi bhú eli inde yi ambila e, belegu † du engú lí Ebhe ambamba ta e muu, † du di-e me ma go ha pí yi imbilangu na mbia, † du di-e me ma go kpokpo 'ngú pí yi maka polofeta, ne me ma go suno 'ngú pí yi, a ayo me yi mbila tata-a ndjindji.

⁷ Yi bhundja nga pindji omavulu mbálá. U du na'u mbálá-a, u 'u lí lelele de-e, mo ombíla salisali-e lele pí? A bhadi moko pí dumu. ⁸ La di-e, † du me bhulu na'u mbala nde 'u lí lelele de-e, okpála aléke lio ngú egú lele pí? ⁹ A bhadi pí yi moko. Okpála akó mboli engú yi ngapa e bhú eli na gandji gandji-e lele pí, † du me u nde mbila eli bhomu-o de-e? A mana me yi ngagama 'ngú pí anvi. ¹⁰ Oeli píla doto kpikpikpi. Engú bini, ndundu hana abhú 'ngú. ¹¹ La-a, lí kpála du nagama 'ngú bhú eli inde ma mbila e de-e, kpála bhomu muu ne gandji kpála, ma di pí ani ne gandji kpála. ¹² A bhadi pí yi moko. Maka yi akunda lie ne bua yi hana nasia angu gba Bu Bhobua-a, yi gili naali nadu okpála inde ngabe ndu nabhuka gba

okpála na Piga gba Ebhe-o.

¹³ Kaka-a, kpála bhende ngagama 'ngú bhú eli gba oandjelu-o, a ayo me aní yo ka Ebhe angu nambamba ta eli ango-o. ¹⁴ Padhá de, anga i dú me ma nde ngayo Ebhe bhú ngua eli bhomu-o, bua ma bhú mayo na paká paká, engú bini, imbilangu gba ma-a li kulu bini ade. ¹⁵ I dú mo-o, a ayo me ma mene pi? A ayo me ma yo Ebhe bhú eli gba oandjelu, engú bini, ma ayó di aní ne imbilangu gba ma-o. A ayo me ma li 'tsi bhú eli gba oandjelu-o, engú bini, ma alí di ne imbilangu gba ma-o. ¹⁶ Padhá de, anga i dú me mú nde ngagie heni pi Ebhe bha bhú oeli gba oandjelu-o, kpála bhe yi nde ne e bhú 'ti Ebhe-e apá me: «A adú moko» li mayo gba mú nagie heni-e lele pi me, aní nde mbila engú mú ngapa e de-e? ¹⁷ A bana i dú me mayo gba mú nagie heni-e nde bha babadha naali-e, i dú bhú oeli gba oandjelu-o, a be ndú nabhuka gba kilí mú yi nde ne e bhú 'ti Ebhe-e de.

¹⁸ Ma ngagie heni pi Ebhe anga ma ngagama 'ngú bhú oeli gba oandjelu-o ane ndú yi hana. ¹⁹ Engú bini, i dú me ya nde apo bhúla ya ne omaha Ebhe-e, ma uu ndjindji me ma pa engú bhuluvue inde li okpála adjé e ne tata ngubula nasuno 'ngú pi uo, ane me ma pa engú koto ndjikpa bhú oeli gba oandjelu.

Pindji nakpokpo 'ngú bhú eli gba oandjelu-o, yi dú nabhundja maka obhelesi okpála

²⁰ Ondaise ma, pindji ongu ma apa e pi yi bhomu-o, yi adú abhundja pépé maka ongisi de. Yi dú ne odjedje ongisi li pápá na siti 'ngú. Engú bini, yi dú ne obhelesi okpála li pápá na nabhundja 'ngú. ²¹ U aye bhú Bhuku gba Ebhe-e me, Ebhe Ngámá apa me:

«Li kpadji gba ogandji okpála ne bhú 'li uo-o, ma agáma 'ngú pí omaha ma.

Abana mo-o, u djé ma de.†»

²² Kaka-a, nagama 'ngú bhú oeli na gandji gandji-e, a ko ehe inde ngasuno mangimbo gba Ebhe-e pí okpála inde i bhuka de-o. La-a, pí okpála bhende abhuka-a, a pí uo ade. Nakpokpo 'ngú maka polofeta-a, a pí omabhuka . La-a, pí obhende i bhuka de-e, a pí uo ade.

²³ I du me yi nde apo bhúla yi ngú nayo Ebhe-e, li ndu yi hana holo nagama 'ngú bhú oeli gba oandjelu-o, i du me okpála bhende i mbila 'ngú bhomu-o de-e, i du di-e obhende i bhuka de-e go oo, u pá de me yi ne obhulu pele-e di? ²⁴ La-a, i du me yi nde ngakpokpo 'ngú maka opolofeta-a, li okpála bhe imbila engú bhomu-o de, i du di-e okpála bhe i bhuka de-e go li bhú ká yi-e, u tsia kó mboli siti 'ngú gba o-o. Engú inde u ngadje e hóló bua uo.

²⁵ Ongú inde awo lie li bua uo-o zé li zi 'kpí. Abhomu-o, u tú 'ndji o ne kuto. U tsia dhógø Ebhe ne napa me: «Ebhe bhú ká yi na paká!»

Yi du amene 'ngú bhú Piga gba Ebhe-e li lelele

²⁶ Ondaise ma, ní abú tata-a lele pí? Nedhinga yi apo bhúla yi lie ngú nadhøgø Ebhe-e, kpála bini bhú ká yi ti da nali etsi, koko ti da nasuno eli gba Ebhe pí okpála, koko ti da nakpokpo engú li Ebhe ambamba ta e pí ani, koko ti da nagama 'ngú bhú oeli gba oandjelu, li koko tsia mbamba tata. A ayo me yi mene ndu 'ngú bhomu-o hana da napa me abe ndu nabhuka gba okpála gba Ebhe-o.

²⁷ I du me okpála holo nagama 'ngú bhú ká yi bhú oeli gba oandjelu-o, a ayo me a de du okpála bhisi, i du bhisi de-e, a de pise bhú bata. A ayo la di me u du agagama

† 14:21 14:21 Tsia bhú Iša. 28:11-12.

bini bini, kpála bini nde ngambamba ta 'ngú u ngagama e-o. ²⁸ Li kpála nambamba ta 'ngú bhomu-o du de-e, a ayo me kpála inde i di me gama 'ngú bhomu-o ndjili bhú ká yi má bulu! Aní nu gama bha bini pi Ebhe agba e. ²⁹ Pi okpála bhe ngakpokpo 'ngú maka opolofeta-a, a ayo me okpála bhisi, i du di-e bata gama 'ngú, amba okpála koko lo doto bhú 'ngú u ngakpokpo e-o. ³⁰ La-a, i du me Ebhe nde asuno engú koko na mbia pi suka yi inde bhú ká yi oo, a ayo me kpála bhende ngagama 'ngú-o 'o nga nagagama, ngubula me kilí aní-e gama 'ngú.

³¹ Kaka-a, yi du nagama 'ngú maka opolofeta, a ayo me yi gama bini bini. Yi mene mo-o ngubula me ndu omaha Ebhe hana sia imbilangu, amba yi to di masi bhú ndu uo hana. ³² Okpála inde ngakpokpo 'ngú maka opolofeta-a, a di bhú uo ne angu ngú nagbite 'bhe o pi engú li Ebhe asuno e pi uo-o. ³³ Padhá de, anga Ebhe kunda de me ní du amene 'ngú pupulu-o de. Engú bini, aní akunda mangbo me ní du amene 'ngú li kúkú. Maka u amemene lie bhú ndu oDadjua gba Ebhe-e hana, ³⁴ nedhinga yi apokbhe bhúla yi lie ngú nayo Ebhe-e, a ayo me olisi* ndjili má bulu! U ha kpadji pi uo ngú nagama 'ngú oo de. A ayo me u ndjili ma bulu ngú nadjje 'ngú u ngakpokpo e-o, maka li líli gba Moidje apa lie-o. ³⁵ I du me u nde akunda nambila 'ngú pindji ongu bini bini-e, u de yi obhosi gba o-o akuti. A ndjindji ade me olo gama 'ngú bhú makpøtø gba omabhuka.

³⁶ Aiya! Ne me yi ngabhundja me eli gba Ebhe-e ayie agba yi, ne me eli angoo, a ko bha bini na yi 'he kpi yi

* ^{14:34} ^{14:34} Abana li olisi nde lie ne angu ngú nayo Ebhe-e, di ne nagama 'ngú maka opolofeta-a bhú ká omabhuka-a, u ha nani kpadji pi uo ngú nalo doto bhú ongu li opolofeta adu apa e de. Tsia bhú 1 Kol. 1:11, 5.

kpi? ³⁷ Li kpála bhundja me ni ne polofeta-a, ne me ani bhundja me ni asia angu gba Bu Bhobua-a ngú nabe ndu nabhuka gba okpála gba Ebhe-e, a ayo me ani mbila me engú inde ma aye e pi yi inde-e, a ko líli ayie ka Ngámá. ³⁸ Engú bini, ani bhuka mo-o de-e, Ngámá mbila di ani de.

³⁹ Kaka-a, ondaise ma, yi gili ne bua bini nadu nakpokpo 'ngú maka opolofeta. La-a, yi ayóko okpála de me u agáma 'ngú bhú oeli gba oandjelu-o de-e de. ⁴⁰ A ayo mangbo me ndu 'ngú bhomu-o dhuku li lelele, yi améne bhú tolo de.

15

Nabhuka gba ní-e alu pí nazuku gba Yesu Kilisito

¹ Ondaise ma, ma akunda matá nakpokpo pi yi Bádha Ngali inde yi asia e, inde yi adhedhe di lie má kpakala-o! ² Bádha Ngali ang-o ngakobho yi, i du me yi nde ngalilila maka nako ma akpokpo pi yi lie-o. I du mo-o de-e, tata li nabhuka gba yi-e ade.

³ Ma asuno pi yi ongu na ngbengbengbe inde ma asia e ka Yesu Kilisito-o . Engú ang-o me: Yesu Kilisito akpi pindji mugwe gba ní-o, maka u aye lie bhú Bhuku† gba Ebhe-o. ⁴ U azi ani, ani atsia azuku bhú 'kpí na bata maka li Bhuku gba Ebhe-e apa lie-o.† ⁵ Ani azuku lie, ani akoto li Piele. Pipita-a, ani akoto li obhulu titima ndjikpa ne ká bhisi gba e-o.

⁶ Pipita-a, ani akoto li omukpata gba e nane kámá bhuluvue mane bhú nedhinga bini. Bhelé na uo nga bha bhúka, okoko amu. ⁷ Pipita-a, ani akoto li Djaki, ani atsia akoto di li ndu obhulu titima gba e hana.

† 15:3 15:3 Tsia bhú Isa. 53:5-12. † 15:4 15:4 Tsia bhú Oz. 6:2; di ne bhú Luk. 24:34-49.

⁸ Pita ndu uo hana-a, ani akoto di li ma, belegu ma du lie ne tetele kpála de-o. ⁹ Ma ne bhulu titima na yeye ane mane bhú ká obhulu titima-o. A na paká me, ma ti belegu da napa de me kpála 'i ma me bhulu titima gba Yesu-o de. Padhá de, anga ma ato nani mbolo li Piga gba Ebhe-o. ¹⁰ Engú bini, bhú bádha bhú 'bu gba Ebhe-e, ma maka ma nde lie inde. Bádha bhú 'bu gba ani nani ani aha e mu ma bhomu-o padhá ade. La-a, ma amene kulu kaka naali nane obhulu titima koko hana. Angu angoo yie ka ma de, bádha bhú 'bu gba Ebhe-e adú mangbo namene kulu bhú ma ngae. ¹¹ Kaka-a, abana ma, abana obhulu titima koko-o, a bhomu-o Bádha Ngali inde ya ngakpokpo e-o, a la bhadi bhomu-o Bádha Ngali inde yi abhuka e-o.

A na paká me okpála azúku di mazuku

¹² Bádha Ngali ya ngakpokpo e me Yesu Kilisito azuku. I du la me a nde mo-o, lele pi li okpála koko bhú ká yi ti da napa lie me okpála inde amu-o zúku de-e? ¹³ I du na paká me okpála inde amu-o nde zúku de-e, bhobhomu-o akunda napa di me Yesu Kilisito zuku de. ¹⁴ I du la me Yesu Kilisito nde zuku de-e, akunda napa me tata bini li Bádha Ngali ya ngakpokpo e ade, tata bini la di li nabhuka gba yi-e ade.

¹⁵ I du me Yesu Kilisito nde zuku de-e, amba akunda napa me ní ngapa eu li Ebhe. Padhá de, anga ní ngapa pi okpála me Ebhe azuku Yesu Kilisito bhú ka okpála inde amu-o. La-a, ani mene mo-o de, i du me okpála nde zúku di de-o. ¹⁶ Padhá de, anga i du me okpála nde zúku de-e, bhobhomu-o akunda napa di me Yesu Kilisito zuku de. ¹⁷ I du me Yesu Kilisito nde zuku de-e, bhobhomu-o akunda napa me tata bini li nabhuka gba yi-e ade, yi nga bha sa

mangimbo gba Ebhe.† 18 A akunda di napa me okpála bhende amu me u nde abhuka Kilisito-o, amu duduma ne duduma. 19 I du me nganí omabhuka ní nde a'o 'to ní 'to Kilisito bha bini ngubula mukobho inde-e, amba ní ne okpála na likabhu naali nane okpála koko.

20 La-a, a mo-o ade, a bha ndju na paká me Kilisito azuku bhú ka okpála inde amu-o! A ko kpála na gigina inde azuku bhú kuo. 21 Padhá de, anga koli kpála bini amene nani me kuo li pía doto, koli kpála bini koko atsia amene la bhadi me okpála amu-o zuku. 22 Ndu okpála hana ngamu, anga ní ne opiga gba Adamu . Ndu okpála hana inde abhuka Yesu Kilisito asía bhadi mukobho ka ani. 23 Engú bini, kpála ne kpála azúku li nedhinga gba e. Kilisito azuku nani kalanu. Li nedhinga ani agó lie, li okpála gba ani-e tsia zúku di.

24-25 Abhomu-o, Yesu Kilisito méne me ndu osisiti angu hana kolo padhá. Ani tsia kó angu e pi ndu okpála na angu hana inde ngagu ani-o. Padhá de, anga a ayo me ani u ngámá akólo bha makolo li Ebhe a'ó ndu obhulu yala gba ani-e lie hana sa 'dhu ani-o. Pipita-a, li 'ngú na doto ndjía. Ani tsia gíe nau-o pi Ebhe 'Dyi e.† 26 Bhulu yala na soso inde li Ebhe abhólø e-e, a ko kuo. 27 Padhá de, anga u aye bhú Bhuku gba Ebhe-e me: «Ebhe a'o ndu 'he hana má kpekbhe sa 'dhu ani!†» Engú bini, i du me u nde apa mo-o, a mbámá me u to Ebhe bhúbhú de. Ani sa Ndili gba e ade. 28 Li ndu 'he hana a akólo lie sa angu gba Kilisito-o, li ngaani makpe Ndili-e, ani tsia 'ó lie makpe sa angu gba Ebhe, ngubula me Ebhe u ngámá pí 'ndji ndu 'he hana má da!

† 15:17 15:17 Tsia bhú Lom. 6:8-11. † 15:24-25 15:24-25 Tsia bhú Ets. 110:1. † 15:27 15:27 Tsia bhú Ets. 8:7.

Pindji 'ngú nazuku ka okpála inde amu-o, yi apíte liyi de

²⁹ Okpála koko bhú ká yi ngasia batisimo mada okpála inde amu-o. Uo ngasia ní? I dú me okpála inde amu-o nde zúku de-e, uo la ngasia batisimo mada uo ka ní? ³⁰ I dú me okpála nde zúku de-e, ka ní ya ngazú likabhu lie ndú nedhinga hana-a? ³¹ Ondaise ma, a na paká me ndú 'kpi hana kuo de ma masikpe. A la bhadi paká me ma ne gindaginda kabula yi akpøtsø liyi lie ne Ngámá gba ní Yesu Kilisito-o. ³² A bhú gudhu na Efeso-o, ma azú likabhu naali sakpa okpála. A mana mugito me ma adú agú gbele ne onú 'te. I dú me ma nde ngabhundja bha bini ndú ongú na doto-o, gbele ango-o atéteke ma lele pi? I dú me okpála inde amu-o nde zúku de-e, bhobhomú asuno me engú inde u apapa e me: «Ní zú 'he, amba ní ndji di vino, anga ní amú mambi-e!†» A ko kukulu 'ngú.

³³ Yi apíte liyi de. Yi mbila me, mú kø dhuku ne kpála na siti 'ngú-o, mú tágba di siti 'ngú. ³⁴ Yi gie liyi li ngbili kpadji, amba yi améne matá siti 'ngú de. Okpála koko bhú ka yi mbila Ebhe de. Ma ngapa mo-o, ngubula me yi sia nümü.

Bhú nazuku ka okpála-a, kute ní adjí lie na mbia

³⁵ Kpála bini tí da nayi ma me: «Okpála inde amu-o, azúku lele pi? Kute u azúku ne e adú lele pi?» ³⁶ Ma gie pi ani me, ngamú-o, mú ne ngingi. Ngua inde mo olu e tí da nakø-ø de, i dú me a nde zi de ko. ³⁷ Ngua inde mo olu e, i dú di-e dadha, i dú di-e ngua koko-o, mú ngalu bha bini líli. Mú lu lálá bhende akø-o de. ³⁸ Pita li ngua akø lie, li Ebhe há pipi lálá na mbia maka ani akunda lie. Ani ngaha pi ngua ne ngua 'lá e makpe.

† 15:32 15:32 Tsia bhú Isa. 22:13.

³⁹ Kute ndu 'he hana inde bhú mukobho-o bhadi kpi kpi. Kute kpála-kuti kpi ne bhende gba onu, bhende gba odhu di ne bhende gba osungu. ⁴⁰ A ne oehe inde na abhúlá, a la di ne oehe na kuto ei. Bádha gba oehe na abhúlá-a kpi ne bhende gba oehe na kuto ei. ⁴¹ A li ela ne zi e, a li epe ne zi e, a la di li oikupala ne zi o. Belegu bhú ká oikupala-a, zi uo kpi kpi.

⁴² A adú bhadi moko li okpála amu-o azúku lie-o. Kute inde u azi e azi mazi. Kute inde azuku-o zí matá-a de. ⁴³ U azi maka ehe li tata nde lie naali ade, li angu nde bhú e ade. Li azúku lie-e, a abédhe ne angu, i tsia dú di babadha. ⁴⁴ Nedhinga nazizi-e, a ko kute na doto. Li azúku lie, a adú kute inde li Bu Bhobua ngaha mukobho pi e ngae. A ne kute na doto, a la di ne kute inde li Bu Bhobua ngaha mukobho pi e. ⁴⁵ A maka u aye lie bhú Bhuku gba Ebhe-e me: «Adamu nani ne kpála-kuti na kalanu, ani asia mukobho ka Ebhe.†» La-a, Kilisito u a'i e me Adamu na bhisi-e abedhe ne Bu Bhobua, ngaani-e, ani ngaha mukobho pi okpála.

⁴⁶ Ehe na kalanu inde u ngau e-e, a ko kute na doto. Pipita-a, u tsia ú la kute inde li Bu Bhobua ngaha mukobho pi e-o. ⁴⁷ Adamu, kpála na kalanu li Ebhe abho e nani ne kpála-kuti, Ebhe abho ani li doto. Kilisito, Adamu na bhisi-e ayie naae abhúlá. ⁴⁸ Kute okpála-kuti maka kute kpála li Ebhe abho nani e li doto-o. La-a, kute okpála inde azúku ngu nanu abhúlá-a, adú bhadi maka kute kpála inde ayie abhúlá. ⁴⁹ Mbia inde-e, ní maka kpála inde li Ebhe abho e li doto. Kpi bini, ní adú bhadi maka kpála bhende ayie abhúlá-o.

Ngámá Yesu Kilisito aha angu kuo

† 15:45 15:45 Tsia bhú Dje. 2:7.

⁵⁰ Ondaise ma, ma apa pì yi me kpála-kuti lí bhú Nau gba Ebhe-e ne kute na doto inde-e de. Kute inde nazi mazi-e ti da nadu duduma ne duduma de.

⁵¹ Yi gbo nga dje yi, ma adjì nambamba pì yi inde ta 'ngú inde lí Ebhe awo e nakolo pì mbia inde-o. Ní mú ndu ní hana de,† engú bini, ndu ní hana, kute ní adjì lie madji, ì tsia kólo na mbia. ⁵² Engú ango-o améne lie bhú nedhinga bedi, maka nakopo ka djila, nedhinga u a'ú toti na soso lie-o. Lí a aú lie, okpála inde amu-o azúku ne kute inde ì kpí matá-a de. La nganí bhende bhú mukobho-o, kute ní adjì lie na mbia. ⁵³ Padhá de, anga a ayo me kute ní inde nakpi makpi inde-e dji lie, akolo kute inde ì kpí matá-a de, ì tsia zí la di matá de.

⁵⁴ Nedhinga lí kute nakpi makpi-e akólo lie kute ì kpí-i de-e, lí kute nazí mazi-e akólo lie kute ì zí-i de-e, lí engú inde u aye e bhú Bhuku gba Ebhe-e tsia kólo mbámbá. U aye bhúbhú me: «Ebhe aha angu kuo aha, kuo matá ade.†» ⁵⁵ U aye mata di me:

«Oo kuo! Angu mu mo oko pí okpála ne e su?

Oo kuo! Angu mo obhibhili okpála ne e su?†»

⁵⁶ Angu lí kuo ngabhili okpála ne e-e, ngayie ka siti 'ngú. Angu lí siti 'ngú ngabhili okpála ne e-e, ngayie bhú líli gba Moidje . ⁵⁷ La-a, a ayo me ní toko Ebhe inde amene me ní ha angu siti 'ngú di ne angu kuo kabula Ngámá gba ní Yesu Kilisito-o!

⁵⁸ Abhomu-o, ondaise ma na mukunda, yi lu kpekpeke, u apíte yi de. Yi nu ndu kpí hana ne kulu gba Ngámá-a ne kalanu. Yi mbila hana me kulu inde yi ngamene e pì Ngámá-a, nú padhá de.

† 15:51 15:51 Tsia bhú 1 Tes. 4:15. † 15:54 15:54 Tsia bhú Isa. 25:8. † 15:55 15:55 Tsia bhú Oz. 13:14.

16

Tia inde ayo nape e pi omabhuka na Yelusalema

¹ Ma adji apa mbo engú inde-e pi yi pindji tia inde yi ngapo e pi omaha Ebhe inde bhú Yelusalema-o. Yi mene matá maka ma aha nako líli lie pi omabhuka na ndu doto na Galatia-o.† ² Ndu 'kpí yinga hana, a ayo me kpála ne kpála 'o mbo té tia inde ani asia e li ngongo, nakpata lele bhende li Ebhe aha e pi ani-o. Yi wo tia bhomu-o nganda yi, ngú napa me ma gó lie, ní apó matá bhúla tia de. ³ Nedhinga ma kólo lie agba yi-e, ma ayé balua pindji tia bhomu, ma tsia tíma okpála bhende yi alo o bhú ka yi-e ne di ngú nanu na 'o'o abhú Yelusalema. ⁴ † yo me ma nu di-e, ya anú ne uo bhú dabili bini.

Onú inde ayo me Polo nu e-o

⁵ Ma agó agba yi pita nakodho 'kpí ka ma bhú ndu doto na Makedonia, anga ma apú bhú ndu doto bhomu. ⁶ Nedhinga koko-o, ní adú mbo ne yi ngú nedhinga bedi. Koko-o, ní adú ne yi oo ngú nadjeke me nedhinga na zini-e kodho 'kpí. † du me ní nde asi ekpí bhe ayo me ní sí e ne yi-e asi-e, yi tsia teteke ma ngú nanu li obili bhe ma adji lie-o. ⁷ Padhá de, anga mbia inde-e, ma kunda bha nau yi ne nakodho 'kpí ka ma makodho de. Ma ngabhundja me, † du me Ebhe nde akunda-a, ma de go sidi, amba ní bhue mbo ne yi ngengele.

⁸ Mbia inde-e, ma ngabhundja me ma du nga bha bhú Efeso sí nakolo bhú 'kpí na Patekote. ⁹ Padhá de, anga Ebhe abhulu 'bho 'ti mu ma mbámbá ngú namene kulu gba ani-e ne angu ma hana sí, belegu li okpála bhelé nde lie ngagu kulu ma ngamene e lie-o.

† 16:1 16:1 Tsia bhú Lom. 15:25-26.

¹⁰ Kaka-a, li Timoté kolo-o, yi mene me ehe bini ato zini bhú ani agba yi oo de, anga ani ngamene kulu gba Ngámá-a maka ma ngamemene lie-o. ¹¹ Kpála bini aú ani bhú djila e padhá de. Yi teteke mangbo ani me ani dhuku bhú guo 'ngú ngú nakolo li bili ma nde lie-o, anga ma ngadjeke ani ne ondaise ní inde u agó ne o-o.

¹² Li 'ngú bhende atsia ndai ní Apolosi-e, ma ayo ka ani bhutsibhutsi me ani nu agba yi bhú dabili bini ne ondaise ní koko ngú natsia yi. La-a, ani kunda nga nanu oo mbia inde-e de. Ani sia nedhinga-a, ani tsia nú.

Polo yi matá omabhuka na Kolito mayi

¹³ Yi du li zuku, yi lu kpekpeke bhú 'bu nabhuka, bua yi adú ne tsulu de, yi du ne angu. ¹⁴ Yi mene ndu 'ngú yi ngamene e hana ne mukunda.

¹⁵ Ondaise ma, yi mbila Etieni ne uo ne piga gba e hana. Yi mbila hana me u adji nani bua o bhú ndu doto na Akai kalanu ngao, u atsia aha lio ngubula nateteke omabhuka. Kaka-a, ma ayo ka yi me: ¹⁶ yi manga ongua okpála bhomu-o mamanga. Yi manga di okpála inde ngamene kulu ne kekele bhú dabili bini ne uo mamanga.

¹⁷ Ma ne djali naali li nago nako ka Etieni, ne Folutunasi ne uo ne Akaikusi-o. Ma ngau uo lie, a mana mugito me ma ngau yi ndu yi hana. ¹⁸ U ato masi bhú ma maka u ato di nako masi bhú yi lie-o. Ongua okpála bhomu-o, a ayo bha ndju namanga uo mamanga.

¹⁹ OAdjua gba Ebhe inde bhú ndu doto na Adjia yi yi ma yi. Akwila ne Pilisila bhú dabili bini ne omabhuka inde ayoyo Ebhe agba uo-o, yi yi ne 'li Ngámá mayi. ²⁰ Ndu ondaise ní inde ei hana yi yi ma yi. Yi yi li yi sunda yi ne nakama liyi li kute yi.

²¹ Ma yi yi ma yi. Engú inde ma aye e me ma yi yi mayi bhomu-o, ma aye ne 'kpa ma makpe. ²² I du me kpála nde

kunda Ebhe de-e, u de tu podje li ani! Malanata: a ayo me Ngámá gba ní-e gógo! ²³ A ayo me bádha bhú 'bu gba Ngámá Yesu-o du bhú dabili bini ne yi. ²⁴ Ma kunda ndu yi hana naali ka ní akpotso liní ne yi lie bhú 'bu Yesu Kilisito-o .

Gandja na Mbia

Mayogo: Gandja na Mbia (New Testament)

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 25 Mar 2022

6b4904fb-f8ce-5931-8218-7cee8914232c